

新都縣志卷十五

藝文 詩

彌牟八陣圖懷古

國朝 果親王

葭萌辭舊堞廣漢得新都圖與峩眉壽名同井絡孤昇
平先六府保泰在三謨八陣存何意惓惓渾一模

新都歎

尤 侗 展成

新都才人官玉局入朝手撼天門哭相公之子狀元郎
杖血淋漓投永昌永昌市上擁諸妓簪花塗粉雙丫髻
白綾新裊綵毫光酒酣起舞龍蛇字蠻童笑殺老顛狂

新都縣志

卷十五

藝文詩

萬里雲南作醉鄉相思獨有深閨婦盼斷金雞下夜郎

彌牟道中望八陣圖遺址

王士正

落日彌牟道霜風百戰場青天迴玉壘遠樹出華陽陸
海三都闊雄圖八陣荒卧龍虛故蹟駐馬惜降王

題楊升菴先生故宅

王士正

侍臣遷謫後常憶秦陵園詞賦留金齒生還望玉門交
州無士燮南海得虞翻廢宅西風裏連蜷桂樹存

碧曉書院歌弔楊升菴先生

田 雯

堞風茵露哀牢疆山川瘴癘難禁當新都公子老戍客

孤臣萬里堪悲傷當時世廟議大禮撼門痛哭千夫強
仗節抗疏言矯矯干觸蠱尾投蠻荒程朱正論臣所執
今昔濮議誰斟量大禮未定大獄起批鱗折檻空激昇
逢君首事有聰萼議論附會來豐坊明堂秋饗復聚訟
分宜餘毒爭相張嗚呼先生遂不返箐酋峒獠羣相將
木弩含沙火雲熱天教老噉紅檳榔吳粉傅面兩了髻
簪花擁妓何徜徉都盧倒吹潑醉墨焚兒觀者如堵墻
羈魂漂流夜郎地何異屈子沉沉湘海庄故墟碧鷄麓
猩猩白晝啼書倉巾杖逍遙鬚眉古圖書遺像生光芒

新都縣志

卷十五

藝文詩

二

彌牟鎮

陳祥裔

竹檜一逕夾流水菊乾楓落寒雲黃潮州儋耳同一轍
祠廟聳屬摩青蒼小子夙昔慕高節况值奉命來黔陽
竊願升階更剪紙招魂歸送蠶鳧鄉高吟死去誰憐句
令我涕泗徒滂滂

匹馬經行處彌牟古戰場曉風寒白骨高樹挂斜陽八
陣雄圖在三分蜀隴荒道邊餘短碣讀罷淚沾裳

楊升菴故里

楊宏緒

丹山
新繁

葦表巍巍依故里墓前古柏望亭亭三千士裏登鰲首

廿二史中續汗青竟老瘴煙成放逐空留痛哭在朝廷
百年鄉有宗人弔酌向黃泉醉莫醒

彌牟鎮八陣圖

楊宏緒

荒邱纍纍陣雲橫萬古居人不忍耕社稷還生新草木
風雷時幻舊陰晴箇中天意離奇甚就裏神機剏闢精
後世桓溫誇妙解當時敵過已心驚

河內令王稚子渙石闕

董新策

樗齋
合江

王稚子世未有墓前石闕雙崔巍千百年來堅且久當
時河內徭役平百姓歌謠不置口死後千人輿襯還表

新都縣志

卷十五

藝文詩

三

此封阡期不朽人情所鍾物亦靈鬼神呵護蛟龍守姓
名官爵漢篆書風雨飄濕未能培古來良吏孰如斯坏
土乃經百姓手但平徭役合之常河內報公何其厚大
賢爲政卽多聞豈用虛聲詐相誘世間穹碑大碣無地
無大抵當時則榮歿則否三代直道終古同今不可信
奚傳後吁嗟乎王稚子世未有

彌牟鎮八陣圖

董新策

魚復沙寒石壘勻彌牟猶見陣圖陳誰將易數分方位
獨想元機運扇巾蛇鳥有形天地老風雲無恙古今神

時平江路烽烟靖攬勝行吟舊蹟新

八陣圖

在彌牟鎮東遺壘僅存

許儒龍

士元郫縣

武侯遺跡蜀多有瑰偉靈奇神所守彌牟鎮東故壘存
八陣分行互奇耦天衝地軸自縱橫虎翼蛇蟠尙紛糾
歲久耕犁不免侵路旁凹凸十存九夔州遺廟對江濱
魚腹浦間陣圖久森森石蘊立江中水齧沙淘敵重阜
更如倣左號棋盤隱約遺跡同不朽其法屢變用無方
神機秘密誰能剖我聞黃帝昔傳心涿鹿之戰克羣醜
竇憲馬隆亦頗諳立勛異域相先後名垂宇宙獨歸公

新都縣志

卷十五

藝文詩

四

事以人傳良不苟才畧洵堪伊呂儔忠誠亦是顏曾友
三代以下公一人一器一物千古壽况是神明運此圖
示之古法期人厚塵埃碌碌誰可言風后握奇徒在口
掀髯高論氣如虹裂眚苦闢功爲狗邊烽不息兵尙屯
坐嘯將軍印懸肘殺以止殺古所云勝於易勝今然否
五利寧知魏絳功莫敖總爲蒲騷狃丞相天威服遠人
至今祠祭輸牛酒師侯此意御諸夷鳥在網羅魚在罟
陣圖雖設將壇空獵獵高牙風怒吼欲排閭闔起先生
定軍山下旌旗走

新都行

李化楠 石亭羅江

新都宰輔楊文忠升菴繼起過乃公議禮真堪息羣喙
嗤彼小兒萼與璉一腔孤憤欲自訢天關阻塞難為通
排雲叩闥叫且哭哭聲直上驚蒼穹血流被體幸不死
餘生流竄蠻荒中平生忠義何處洩靈均萬古悲長虹
插花塗面聊復爾狂游不信因詩窮男兒終老瘴癘地
魂夢不離蓬萊宮世人不解欽高節徒讀文章誇此翁
文章小技非難工會當有人角其雄長河洗出光明錦
草木山川亦改容

新都縣志

卷十五

藝文詩

五

八陣圖

李化楠

豈論魚復與新都蛇鳥還應識舊圖天下奇才有人嘆
古來儒者似君無野田荒草秋風暮敗瓦頽垣古木枯
少小幾回周覽處纍纍高阜莽榛蕪

彌牟鎮八陣圖遺址

鄭王臣

臥龍氣卷中原土彌牟原頭秋講武纍纍石蕞儼成行
二十八宿羅部伍 八陣圖在彌牟鎮者二十有八當頭陣法也 風雲合沓龍

虎纏直追風后師尚父常山蛇勢非其倫鄭國魚麗詎
足數想見當年號令嚴變化從心揮白羽瑀戈貝胄出

祁山魏人如鼠蜀如虎司馬家兒走且僵王雙張郃安
能禦長驅欲蹴鄴都平往繫曹叡尸諸俎大星一夜墮
營中長使英雄淚如雨臨邛火井久無光彌牟鎮圖留
萬古風旗雲馬神歸來夜夜荒原聞戰鼓

觀易吟

楊鳳庭

一者天之根

真一混成無名老子云天得一以清地得一以寧

用九不為首

真一

九變而得十

初九潛勿用上九亢難久首尾無端倪

以初

為首則上為尾以上為首則初為尾皆以無為用

始終孰能剖

如環之無端

太始本

無始

終則有始乃貞下起元之數萬物各受之而非大始真一也道無毀无成何有始哉

谷神可

新都縣志

卷十五

藝文詩

六

測否

老子云谷神不死此至物也

從開玄牝門

喻陰陽奇偶也邵子云太極初分先得一

為一後得

九變十數有

真一一氣而生九變已得十數變者陽運數者陰凝

一一

以為二

一者變之一其數已成二也

一二三相友

一二二者變之二其數已成三也老子

云一生二三生萬物

奇分耦而奇

奇行乎耦中分耦而成奇數

耦並奇而耦

耦并奇數

一三五陽精

契云三五與一天地至精在圖書不變一生三一在三中生五

一在五中

參伍萬類藪

凡陽本參天凡陰本兩地

是為龍之變

龍圖主變

用是為龜之守

龜書主靜體

是為天地經

天一地二天三地四天五地六天七

地八天

五十五五

五十大衍之數五

五十五神五

雖數

五十五九變無正

五十重五

九宮四十五而大衍五十者五重其用也隱寓

其十以神藏是曰竅重顯光愈妙以易顯仁藏用之旨

天統地參道德首章之義正同妙高而竅深顯德而神道一復大易心易統天心兩

觀重玄門老子云常無欲以觀其妙常有欲以觀其竅體用之謂也一一與五五乾

坤互藏身天依地地附天故乾無十坤無一始于一一

也無為並無名非空無也謂自然神化也心心印其真

新都縣翰林院典簿王一正位中綿竹

風送輕車過始康半城斜日桂荒涼茂林豐草彌牟鎮

斷石殘文相國坊一派鳥飛人寂寞幾家烟火樹蒼茫

無情有恨憑誰寫駐馬吟詩入舊囊

新都縣志 卷十五 藝文詩 七

謁升菴先生墓騰越州州判馬能修健齋德陽

此身合筭小游仙萬里歸來拜墓前時余方卸笑我永

呂無宦累嗟君滇海不生還程朱正理援為例聰蕁何

人敢竊權試問逐臣誰是伴潮州儋耳史曾傳

謁升菴先生墓茂州學正馬儒修企魯德陽

滿腔悲憤幾時伸竟把孤墳葬此身不筭科名俱上列

最難才子屬忠臣碑經薛護文猶古土被雲埋草自春

西蜀許多名士在要推傳粉插花人

游桂湖懷升菴先生山東分水馬永修鶴齡德陽

曾從墳下拜先生爲訪遺踪又入城丹桂香中傾耳聽
月明恍覺有書聲

權將出處問微波涓濁涇清費揣摩求志隱居行達道
可曾孤負此湖麼

謁升菴遺像

雍正己酉季冬毛振翮司馬題云是像乃先大夫兆文公覓自滇南敬藏兩載今遵遺命請歸狀元里因讚曰文章氣節今古共佩道貌如生風流未墜

李海瀛

神洲德陽

滇人傳像肖蜀士用情深萬里途攜到三冬日計臨有
唇難着齒取貌豈知心我訝衣冠異澄懷認古今

新都縣志

卷十五

藝文詩

八

謁升菴太史祠

李海瀛

昔我曾經先生墓翁仲無言疑泣露世澤猶垂鼻鼻陰
搔首憑吊忘日暮今我又謁先生祠文獻在茲誰能步
想見當年骨鯁風撼門大哭心如訴獨守程朱理不移
繼統嗣統何忽誤攘臂深斥張桂流苦口不憚逢君怒
廷杖幸甦投南荒即使身死終無負當時偏異十九人
天愛斯文加呵護石榴韻早結知交綾緘詩曾徵雅度
七十二年節堅持四百餘種書丕著有時傳粉了髻粧
耗磨壯心誰及悟潮州抗表韓文公長沙懷才賈太傅

李白夜郎蘇儋耳千古文人同厄遇我瞻遺像極低徊
伏闕丰規恍如晤遙憶碧嶢山下祠洞獠薦馨寧改故
是非身後有定評議禮奸邪今何處

彌牟鎮八陣圖

高

辰

白雲金堂

漢代千年邈若岑諸葛大名垂至今隆中習就鬼神機
欲扶日月旋乾坤詎知天意三分定祇教八陣任縱橫
天地風雲各變態烏蛇龍虎自屈伸初試七擒服孟獲
旋經六出整三軍魏人畏蜀如畏虎甘對使者羞幘巾
自非營中大星隕指顧何難定兩京我今屢過彌牟道

新都縣志

卷十五

藝文詩

九

高低凹凸土壘成歲久耕犁鋤不去呵護須知有鬼神
天蓬天英常赫赫六丁六甲何森森儒者從來戒語怪
非常之人豈所論君不見蚩尤涿鹿已成擒風后曾著
握奇經又不見神禹疏鑿六州平庚辰童律隨其身

王稚子闕舊拓本爲黃秋盦題

翁方綱

安陽亭西薦弦歌永初詔誦絲五紘異哉充公考雒水
不知樂府從孝和西川千年紀循吏柱天雙闕高峩峩
大書持以郡表縣官閱次敘無差訛當時記實非一語
八分字字軒騰波績畫之工邁顧陸武梁何足煩摩挲

劉君米芾書畫友日視犀筓不足多近者漁洋役車駐

尚剔壘石加研摩惜哉此拓前百載黃君名翼聖躑躅字子羽

空山阿匆匆弔古摸未盡留此悵結情則那幾秋二闕

失其一闕字半泐遑問它前者馳訊陳廉使碑陰數畫

昏傍弋今茲册裝字二十翳比寒鏡晨初呵洪家所藏

想正爾淳熙已誤濃墨磨塔影園中老文學定未獲此

勤切磋婁機弗辨靈與質佩觿漫檢陂作頗百年又到

黃氏閣小蓬萊句誰共哦秋盒工書復工畫要補漢蹟

窮隸蚪蚪絕旁觀有顧八蘆汀寄書試傲桂未與羅兩待

新都縣志 卷十五 藝文詩 十

我蘇齋摹本出氣壓宋榻千丸螺

送曹素為合新都素為余癸未禮闈分校所得士也王文治高郵

馬首春深指綠蕪江山今古識魚鳧峰迷白雨千盤峻

棧入青天一線孤簾肆有人還待訪芋田無稅不須輸

微聞父老相傳語只望艾翁再剖符

彌牟鎮觀八陣圖 吳省欽白華

春田騷騷沈礮車負鞫健兒鼓隴胡彌牟渡邊解鞍坐

八陣突見當頭圖土城四門就礮滅六十四魁猶撐扶

魁方一丈高三尺漢尺較短今宜殊兩陣對若夾城仗

百二十八魁森如風雲天地聽號令何物敢抗神姦誅
畫轅日高搗鼓袍丞相巾扇黑輜輿翠蓋金鈇備儀從
虎賁六十翹跼曲屯精銳盡擐甲披執或逮羗賓渠
千戈萬槊指麾定截若界畫開爻閭神光離合倏千變
鈞陳元武迢天樞焱騰霧塞雨雪颭倏退山立聞山呼
天生王佐秘神授握奇經可參陰符丞相感激報三顧
智在誠至非形摹銅釜自熟木牛走祇此易理中潛孚
卽如此陣勒竇憲燕然銘績朝單于人之無良事偶中
四維四正拋土苴孟獲不服仲達嘆營壘安足論毀譽

新都縣志

卷十五

藝文詩

十一

沔南墓域昨親拜有圖未覩心煩紆夔州跼蹟並撝護
恨不翦魏遺吞吳明神如水志如日敢乞靈佑殲蠻奴
武擔壇土或留寸馬頭積照懸成都

楊用修先生故里

朱雲駿

侵晨風日好不厭林壑經平野邇延綠遠嶺時來青竹
樹善窈窕叢桂紛澗亭升菴命世才議禮昭日星滇南
惜遷謫篋索窮杳冥紫宸夢歛忽素鬢嗟伶俜塵埋速
化者炳耀先生靈于役企高誼勝地留餘馨

過楊狀元故里弔升菴先生

瞿 頤

逸才曠代繼青蓮一疏投荒四十年宗廟是非爭大禮
家門興替兆臚傳丹鉛自擅名山樂粉黛偏尋北里緣
六詔風烟腸斷處魂歸蜀道有啼鵑

彌牟鎮觀八陣圖

沈聯芳

陰風瑟瑟動地震彌牟鎮前馬不進老牛僵臥鞭弗開
羣羊濺濺羣馬驕道旁指點一老翁髮鬣能知舊時陣
圖成一百二十八眼前存者無有十六七當年號合蛇
鳥驚至今風雨鬼神出鬼神出栖烏哀殺氣煜煜黃雲
開飛狐狡兔不可以竟入何人敢向當頭來蜀人虎魏

新都縣志

卷十五

藝文詩

三

人沮大星流漢祚去軍書夜報鐵騎飛此地誰聞教戰
鼓荒煙零落蔓草深徒使行人嗚咽悲忠武昨者魚復
過城樓下瞰臨江波陣數未有如今多又聞碁盤市市
邊有陣亦如此星陳山布更倍之變幻不數孫吳子數
多數少雖各殊千紀萬律同一旨君不見銅雀瓦沉流
浙江東宮殿皆劫灰廟前之柏猶爲人愛惜此圖應與
惠陵草木同栽培

過新都拜楊升菴先生墓二首

沈聯芳

早歲聲華便四馳三川文望重當時贖刑一論霜寒簡

大禮重陳淚滿墀自爲青蠅難用直遂從紅袖遍題詩

中溪李元平谷洪池南叟唐鎬先生臨終時句腸斷知心寄所思

龍門高峙月波虛斜日松楸滿故墟博雅直追蘇玉局

怨誹不學楚三閭先生詩怨誹不學離騷侶卅年魑魅愁同役畢世

丹鉛剩著書一自碧鷄歸葬後精魂長得傍先廬先生附葬

於少師石齋公墓側

謁楊升菴先生祠

李調元

蔓草高墳曩屬碑楊氏祖宅繚垣顏公子戍死滇南陞

始康郭外留荒祠當時議禮主者誰撼門一慟先生爲

新都縣志

卷十五

藝文詩

三

紛紛濮議何其卑程朱正論我守之批鱗履尾何敢辭

吾輩不朽方在茲大禮未定身先危折檻牽裾忠見疑

璫萼首事居貨奇豐坊曲論天子毗逢君不顧千載嗤

明堂聚訟復參差餘毒得毋鈐山遺嗟哉南竄無歸期

越睽老搗羣相嬉鱗膽爍膚濕淋漓天使老啖蛤雄雌

了髻盤頭面傅脂插花擁妓相嫵媚胸中錦繡何處攜

醉來裙衫當臨池吐氣蟠屈成蛟螭棘兒撫掌都盧吹

箐酋峒獠皆來窺丹鉛錄成識者稀何異正則離騷詞

小橋獨樹明斜晷聲聲鷓鴣啼竹籬松杉一逕流水澌

古屋破牕風颺颺葛巾草屨山人姿遺像笑兀難委隨
潮陽儋耳同一悲淚沾楓菊爲殘萎先生亮節夙所思
况逢瞻拜欽丰儀試哦海畔孤臣詩不覺泣下如綆縻
雙桂堂楊升菴故宅卽今廳署雙桂殆補植也

李調元

留耕家世福雙全豈料人闌酒亦闌仕宦從來真傀儡
家山何處望團圞青蛤夢斷啼鶻易金雁魂歸化鶴難
果有堂前雙桂否丹心丹桂定俱丹

八陣圖歌

彌牟鎮作

李調元

新都縣志

卷十五

藝文詩

十四

有客騎馬來新都逢人指點說彌牟森然魄動下馬拜
武侯八陣遺荒墟緬古軒皇授神術布軸抗衝森紀律
卦義微參數更靈井字成形制尤密蚩尤殲戮著奇功
千載獨傳諸葛公五行操算由天授六花變幻非人工
是時高壠狐兔嘯四面林樞鶯鸛叫車廂折衝鳥翔火
飛翼浮沮龍騰跳橫天鶴列儼成行匝地魚麗不可鈞
憶昨三聘翻然悔茅廬本爲蒼生起身比管樂殆過之
心折關張良有以圖成犄角誰能攻綸巾羽扇何從容
畏蜀當年同畏虎得狗如今羨得龍惜哉出師方盡瘁

內蠻跳跋分其勢車蒙未得驅中原鋸齒空教吞虜地
事壞誰當挽天迴心傷不獨指星墜至今怒氣鬱沙麓
屢遭剗平仍磔卓戰場殘廢爲民田往往犁邊拾古鏃
月黑時聞金鼓聲天陰疑有鬼神哭君不見棋盤市夔
州城今人亦有能兵者黑白枰中總不清

楊升菴先生墓

張邦伸

文忠名繼三楊後相業巍巍映華胄升菴生爲獨角麟
日誦萬言心自究弱歲飛步捷南宮杏花歸踏沙堤紅
地負海涵驚絕艷藝林咳唾生英風時逢大禮議興獻

新都縣志

卷十五

藝文詩

五

撼門痛哭天爲變謫戍難迴璫蕁心挽舟幾中張子箭
萬里奔馳向永昌文星從此落邊荒滇池處處吟風葉
了髻時時對酒觴可憐七十猶行役華髮傷心板橋驛
自古文人多數奇不獨青山悲太白

漢循良王稚子墓

張邦伸

漢代重循良治績與古鄰王君少任俠意氣何輪困折
節事經史律令時討論初任功曹職割斷昭平均繼邀
司農薦賢聲達楓宸溫固多猾賊洛尤多冤民公至摘
其伏一一撫以仁大禁釐予習重恤商旅貧羣奸旣授

首風俗亦還淳寬猛交相濟四海欽若神一朝痛奄逝
萬口號青旻喪車入旁郡頌德尤津津綱目特書卒如
君能幾人安陽亭西路歲歲薦蘩蘋益州本故土遺範
垂千春至今墓前石雙闕高嶙峋

彌牟鎮八陣圖

張邦伸

彌牟鎮前舊土壘人傳八陣當頭圖解鞍下馬細審視
按之圖誌無差殊土城遺址久殘滅四門二首均已無
惟有纍纍魁排列百二十八猶森如魁方一丈高三尺
如星如奕如聯珠棋盤沔陽數加倍後世強作下營呼

新都縣志

卷十五

藝文詩

六

魚復江邊號方陣厥數減半仍其虛憶昔武侯此教戰
演用重易通元樞天衝地軸挾蛇鳥風雲龍虎環四隅
中建大纛司號令指揮百萬隨卷舒鏡鐳夜鳴山岳動
旌旗晝掩熊羆趨吾聞黃帝制軍陣井字肇分中外區
涿鹿一戰清霾霧蚩尤負固干天誅握機生尅出風后
六韜鈴畧歸陰符鵝鶴魚麗通祖述常山應變沿孫吳
惟公步伐叅新意車蒙鋸齒憑山隅從來王佐本天授
神悟類不關傳書永安宮中受顧命慷慨自矢匡遺孤
心知漢賊不兩立南人未服先渡瀘邛笮冉駹計日下

操縱孟獲如嬰雛回兵北伐出斜谷雜耕漢沔籌儲胥
木牛流馬供輓運車聲直逼東西都誓將次第殲吳魏
不使生狼生貔貙金刀數盡天弗祚大星夜落驚啼鳥
仲達周視按營壘奇才天產頻嗟吁我公精氣貫日月
遺蹟在世神護扶時從陰雨聞金鼓那有窟穴藏妖狐
桓温自謂能解識或亦約畧觀其粗君不見馬宣威當
殿請征虜偏廂鹿角授方畧迅掃涼隴風摧枯又不見
李藥師海上擒驕蕪六花小試向高麗遂教萬里傳頭
顱二公行陣守心法不啻親受南陽廬始知作術探元
天人徒

新都縣志

卷十五

藝文詩

七

題升菴先生畫像

孫士毅

披髮投荒二百年當時痛哭九閭前
謫居競識蕭夫子流寓爭呼賈浪仙
椎髻風流無藉在弓衣詩句有人傳
如何曳杖疎閒貌洱海行吟墮瘴烟

楊升菴故里

乙未科進士

徐志鼎

春田
平湖

通經方足稱奇士憂患又從識字始
若云愚魯到公卿騫汚驚傳徒穀耻
若云聰明多蓄害宏邈人式清徵美

文章慎修副朝譽人散酒闌洞至理升菴先生瑋麗才
漢唐太白長卿似注張喬宇動至尊木天薇省都卑鄙
浮雲蔽天天蒼蒼居高不信聽尺咫細人巧中傷泉下
家遠君門嗟萬里傅粉挽髻歌烏烏不聞宣室逐臣起
魚善吹沙豺善啼虎匪虎兮兕匪兕奇窮何疾没世名
盛名不聽九京耳蒼頡欲洩造化奇驚動鬼哭夜不止
古來才大世莫容不關下士雙瞳死卷曲之才詰匠遺
造化保全良有以行人懷古過新都荒烟落日孤城裏
至今文藻重江上何須傾倒東陽李

新都縣志

卷十五

藝文詩

六

彌牟鎮觀八陣圖

李鑾宣

方伯

客過彌牟渡流覽八陣圖壁壘縱以橫立馬增踟躇天
衝及地軸奇正形不殊風雲互起伏蛇鳥爭盤紆元武
列後勁鉤陳爲前驅變化出神智陰陽運機樞指揮一
以定坐令神姦誅惜哉志不遂天意終赤符懷古心
傷夕陽啼老鳥

新都縣楊升菴先生故里

李鑾宣

彤廷拜杖血糝糊抗疏真同折檻呼宗廟有靈爭大禮
家門無恙兆傳臚南荒歲月悲遷客北里烟花狎彼姝

了髻白頭聊戲耳莫教故態笑狂奴

彌牟道中

張問陶

不喜彌牟道頻年動客愁離情縈昨日浪迹嘆重遊驛
路通車轍人烟煖市樓鄉心征馬識百里故淹留

題楊升菴先生曳杖遺像

趙文哲

絕徼斯文感在茲蒼山洱海凜鬚眉直從曳杖行吟地
想見排闥慟哭時張叔詎傳封禪作虞翻空抱首邱思
高樓寫韻人如昨腸斷天涯錦字詩

過新都楊升菴先生故里

吳樹萱 壽庭 吳縣

新都縣志

卷十五

藝文詩

九

出郭初程紀始康桂花香在舊書堂伏歎坐歎千鈞失
縱酒行歌雙髻狂百代丹鉛留著述此邦文獻有輝光
潮陽儋耳同青史遺巋欣瞻古道傍

新都弔楊升菴先生

陶澍

朝內何人念敬皇滇南回首暮烟蒼山迷故國三千里

夢斷中庸十八章

升菴生時母夢神送五代忠臣夏魯奇至曰武臣也以中庸十八章輔之

賈誼少能憂漢室虞翻老尚棄蠻荒白頭粉面雙髻
起舞汎瀾淚數行

楊升菴先生墓

汪仲洋 少海

連蜷雙桂幾經秋故國猶傳正首邱賈誼有才餘慟哭
屈平無地著離憂淋漓血肉金門杖冷落丹鉛瘴海樓
空使九原聞赦詔泰陵風雨阻中州

新都楊升菴先生故里

辛酉科進士任瀘州知州

朱錫穀

菽原侯官

撼門一哭震天間萬里投荒亦可傷大禮自應尊嫡統
小臣原不負先皇閨人夢斷刀環約蠻女衣霑醉墨香
畢竟金雞飛不到空合其雨怨朝陽

窮愁翻為著書忙絕艷驚才世莫當萬卷丹鉛歸校錄
六朝金粉入詞章眼中吾老無餘子身後人來有正楊

新都縣志

卷十五

藝文詩

三

青史遺編俱論定小山叢桂發新香

聞故宅二桂樹尚存

毘橋河

辛酉科選拔松潘同知

王夢庚

西躔金華

欹岸置毘盧橫橋琢瓊玉馬渡不敢嘶寒流卧飛瀑
新都楊升菴故里

王夢庚

雙桂今何許高蹤不可攀穹碑空落日遺籍自名山蓋
代文章富羈臣道路艱滇池千萬頃愁絕賦生還

彌牟鎮

王夢庚

迢迢始康城峩峩道旁石洋洋湔江水羅羅砂中磧彌
牟鬱古鎮風雲倏變色日有八陣圖武侯遺勝蹟武侯

王佐才問陣非所悅吳魏事紛紜聊小試其術魁百二
十八八八成行列陣法演當頭風后湖遺說卽此偶列
羅龍蛇鳥虎集江東陸年少窮年莫窺測慷慨誓六師
天不祚漢室盡瘁矢匪躬徘徊長太息

新都楊升菴故里

王夢庚

父掌綸扉子鼎元酒闌燈炮語悽然一庭議禮批鱗日
萬里投荒竄鳳年壯志難銷憐角髻高文何綺痛瑤編
名山空說千秋業雙桂蕭森起暮煙

雙桂猶存

漢循吏王穉子石闕

王夢庚

新都縣志

卷十五

藝文詩

三

新都城北岸山紫漢闕嶙峋蠹遺址莫辨元興立石年
循吏爭傳王穉子穉子芳名東漢垂廣漢邾人懸舊履
先除溫縣後洛陽從駕榮瞻侍御史商人露宿牛任眠
政成河內敷遐邇洛陽自昔號朝歌淫酗餘風肆奸宄
燭照無遺神算驚擿伏發奸臻上理我讀孝和樂府歌
外猛內慈稱樂只宏農假道歸蜀都安陽亭畔崇祠起
送葬不辭千里奔峩峩雙闕寒烟裏洛陽東列溫縣西
兩地懷思徧村市堂房馬鬣負土高石難磨泐名爭企
搜羅金石繫古懷其政其人垂萬禩洪趙徵文記載詳

歐陽錄後傷殘圮闕高一丈五尺羸下方上銳精磨砥
分鐫隸字三十一古勁匪直鍾梁比三寸五分點畫嚴
劉涇作記非虛美旁風上雨苦漂搖建中上有題名紀
漁洋秦蜀數驛程宰堵波高巧舉似一白摧頽溝澮侵
禹鼎沉淪歸泗水小蓬萊閣投經堂辨列微茫具妙理
嗟我游蜀三十年景行餘徽仰而跂東觀漢紀溯歌謠
徭役均平百姓喜彌牟鎮接舊鄴城殘字摩挲頻諦視
先賢邱壟絕採樵永和后詔煌煌峙文翁葬蜀苦無稽
劉涇記云文翁葬於成都其石室在學宮石闕一坏何岷岷峨嵒高挹倚嶠

新都縣志

卷十五

藝文詩

三

岷麝煤珍認澄心紙

新都道上見桂花

王夢庚

楊家雙樹久經摧又見黃金粟一堆色潤尚含宵露濕
香濃恰趁曉風催子飄鷺嶺龍宮外種自瓊樓玉宇來
愧我征衣塵未撲一枝披拂幾徘徊

升菴故里

夏魯傳奇入夢祥中庸十八輔篇章如何一代倫元手
竟作千秋守戍郎萬卷書成才卓越雙鬢聳氣昂藏
朝陽試誦夫人句惆悵滇南隔故鄉

晤劉煦谷別駕

紹文

權新都

舊德遙馨徧婺區君家兩世宦游俱

君祖為金華協鎮父為金華邑宰

與題蜀道魚垂袋箸借新都驥展圖石闕遠探循吏跡

地有王稚子墓闕

陣門細繹武侯模佇看移旆西招外萬里旃

林雅化敷

君將司後藏糧務

新都縣寶光寺

宰堵波高紀有唐十三舍利吐光芒閒從遺礎尋題字

認得升菴詩幾章

升菴先生墓道

何人鶴

雪浦綿州

新都縣志

卷十五

藝文詩

三

客行新都道萬象目中積大野插青秧平疇開遠碧冷

落升菴墳荒園誰與關先生本才人瑩然玉界尺廷試

冠羣英面皮猶唧唧八斗齊謝安一石追曹植信知千

羊皮不及一狐腋胡乃遭璵璠議禮遣戍役遠竄投南

荒夜郎同惋惜著述四百種恨血成和璧自君歸黃壤

竟使雷聲寂竭來弔邱墟烟昏日將夕聊吟有韻文伴

此無腔笛

始康校士有懷升菴先生

楊道南

芹洲邑令

三月天彭喜賦詩又從此地作人師文章未許探三昧

節操還能凜四知筆掃文壇風去疾燭殘鎖院月來遲
桂湖猶在人何往正是秋空牢落時

桂湖

傅薦元

波池側畔縣之陽湛湛渠光溢桂塘清入玉壺花宕漾
種來蟾窟月芬芳緣堤時湧三秋雨深院都圍百合香
賢宰若知重愛護滿天蘭麝撲甘棠

仙觀

傅薦元

新城東壁堊楮扉樓閣森森聳翠微丹竈煙雲開霽色
玉臺鹿大弄霞暉傳來麻女青鸞去聞道真人紫府歸
新都縣志

卷十五

藝文詩

十四

此地有靈通華岳月明嘗見鶴翻飛

龍門

傅薦元

九九真源紫界封金天削出翠芙蓉高澄漢北銀河水
俯矚城南玉壘峯仙洞曉烟浮碧霧楮山夕照映瓊宮
魚鱗變化知多少長作新城孕毓嵩

白螺泉

傅薦元

滄海濡纓歌孺子蘭亭載酒楔羲之何如此地螺泉水
勝似城南魯國池春湛瓊膏培稔稻秋邀明月濯漣漪
癡他化物留遺愛傳與當年邑宰知

八陣圖

傅薦元

彌牟古鎮石紛紛丞相兵機迥不羣
四六天衝龍虎變餘奇地軸鳥蛇分
氣吞吳魏三河士壽聚峩眉十島雲
漫道一謨空繚繚伊周遺蹟未前聞

寶塔

傅薦元

北門古寺擁松喬靄靄浮圖插碧霄
悟達能神通舍利唐宗何意鎮瓊瑤
晴添鏡彩層層麗風送鈴聲故故迢
迢更落湖光搖桂影蓬萊仙島未須饒

石闕

在督橋河東漢循吏王稚子墓劉涇撰記字已湮滅後署令薛諧律重修勒石詳省志

新都縣志

卷十五

藝文詩

三

史欽義

甘棠留異地過客想芳型荒塚名先占
崇碑記尙明帶環河水活石列翠屏
橫方畧光青史遺風景肅青

古直渠

楊狀元墓前舊有直渠寶光塔影掩映其中號曰玉筆點銀河

渠直儼如矢微風漾碧波遠峯沈玉筆
點水亂銀河預兆泥金信先占白紵歌
遙瞻留塔影禾黍舞僇僇

桂花亭

卽今廳署係楊太史桂林中亭也

史欽義

昔植桂千樹今栽槐四行朱研秋葉露
詩報紫霞霜欣彼雕龍地悲看射鴨堂
如何忠直後閱世變滄桑

石鏡

史欽義

不受江心鑄高懸照膽明石頑偏內朗山蠢更輸誠雨
洗粧臺曉風磨金錯英家園湖一曲兩地各晶瑩

赤岸山

史欽義

名山橫劣崩循麓起重稜科界朱欄亘高鏡赤壁層明
霞光煜煜彩電氣峻嶒道岸知誰達精華稱智燈

恭紀千叟與宴

李璠

九霄捧卿雲五鳳銜

丹詔

新都縣志

卷十五

藝文詩

五

帝澤同春陽光輝無不照微臣長西川煦嫗荷福曜欣
隨耄耄肩來集蓬壺嶠良辰值新韶霽色瞻德耀引年
恩有加角徵諧古調青竹杖扶携紫霞杯飲醕
壽世人壽增丹顏駐如少

秋日遊木蘭寺

李璠

久仰仙臺跡乘秋曉日晴蒼松環嶺秀翠柏引風清懷
古窮何病傳今學有成歡餘還自愧無志負

神京

祝周太孺人八十壽

李陽棫

稱兕躋堂祝循陔普雅詩婺媠星合度翼軫野分司萱
茂洪都地蘭芬朗水湄薰風延爽籟長日愛晴曦毛屬
依桑梓心傾切藿葵節當槐夏候壽慶麥秋時上族簪
纓盛名閨矩獲垂濂溪綿閎閱黍谷煥門楣淑秉溫恭
質仁符婉變姿女紅勤習菑姆訓勗治絲禮本陳籩學
書緣隔幔知鏡裁牋爛熳奩貯墨淋漓吟絮才偏敏簪
花格倍奇史研東觀記文勒北山移櫛土工難擬針神
巧莫窺玉臺鴛奩合銀管鳳笙吹未覩施縈袞先看結
悅禱八門躬請醴奉席肅將匱柔溫尊章色謙諧娣姒

新都縣志

卷十五

藝文詩

七

儀屏華裙着布懲惰髻成椎種浴鴉青峪裳湔鴨綠陂
挹漿芻醞漉執爨竈觚炊摯性安廉約慤情樂解推每
分遺穗利恒賑翳桑饑升斗咸沾惠權衡悉協宜夫人
嫺內則君子擅宏詞好共篝燈佐非徒井臼持案齊鴻
敬舉車挽鹿爭馳圖史家儲富文章代起衰謹嚴今典
誥佶屈古皇羲錯認嘲頭腦誰云摘領髭毫頻抽虎僕
坐每擁臬比積帙盈篋笥連篇付剞劂浮雲舒眼界霽
月豁襟期士仰龍門價人遵鹿洞規授徒懸絳帳課子
列紗帷繡戶機聲促蓬牕燭影隨和丸同噉蔗畫荻勝

臨池經緯歸維綜璠璣屬玳琪五株庭植桂三秀圃生
芝藝苑文先蔚黌宮藻獨摛探囊錢中選削玉斧高斯
藉貴金張胄名尊孔鄭師縑緇依朶殿

綸綍沛

彤墀縹緞當官縮揚旌出宰麾

紫鸞來

北闕朱鳥到南維候氣雲呈瑞流丹石作脂家瀕彭蠡
澤治蒞洞庭陞綵仗承歡洽斑衣遂慕思澤乎桑雉乳
望慰篠驂騎報政超題最封函

新都縣志

卷十五

藝文詩

三

特授披容城君號佛武邑母稱慈戴德峯原峻懷清水
不淄樓仍虛白舊邨守善卷遺崔井剡淪髓萊泉飲浹
肌萑苻蹤已剪鼠雀訟無辭緱氏馴羊繫羅公逸馬羈
保民身是障載道口爲碑問俗循聲著觀風雅化熙授
餐筵以設校藝鑑何疲旣飫甘腴矣還聆教誨之管絃
聞自昔鼓篋孫於茲膏助宵燈費薪捐夜火貲垣墉資
繕葺罅漏飭塗茨公暇書搜秘箋餘字析疑有模金受
范無當玉姪庠序騰奎壁閭閻愜畢箕官箴銘益凜
壺範福彌綏杞梓堂前樹蘭蓀砌下枝聯芳編棣萼競

響奏塤篪便已誇邊腹良由說馬眉瑤環紛璀璨頭角
露鬢鬢始信藏而大端由德所基當年翁點領此日姥
含頤喜躍幃屏雀音催綺陌鸚褱衣榮繡雀舞袖絢文
螭鍾郝儀型在陶歐跬步追添籌應紀鶴介壽合稱糜
預借山增嘏何妨海測蠡八琅璈共憂繞膝樂融怡

新都王稚子石闕

子六十年前猶見其二今存一且中斷而爲兩幸鄉人累石接

監之蜀中漢石僅存此可寶也

張懷泗

一柱騎而西者二一柱車而東者亦如是挽之皆以橐
駝行雕鑱奇古峙平地舊傳石闕立年深雙柱雖折尙留

新都縣志

卷十五

藝文詩

五

字一書兗州刺史官洛陽一書先靈御史官河內盪磨
日月弄雲烟龍跳虎臥鸞翔翅東漢至今二千年滄桑
變換等兒戲此柱巋然不動搖較勝雲臺沒荆棘新都
之北大道傍公卿過此每憑式始識天公佑善人甲丁
長守王循吏循吏誰渙其名稚其字噫吁噉二柱一留
今斷殘採樵之禁非艱難

和新都楊芹洲明府清明集同人酌楊文憲墓由

黃中亭學博却寄

楊文憲公墳巖巖閩海芹洲釀醖之新都萬口爭傳遍

希音繁響鏗相隨憶公辛未大魁日海涵地負琳瑯筆
當時國勢正清平花磚鈴索絲綸密豹房弓劍痛臣民
青宮寂寂愁丹宸興獻一子賢且長天書詔到真天人
珠旒玉衮明堂坐安陸飛龍上青瑣以天下養理則然
槩欲尊崇毋乃左公家相國柄朝綱百寮執事徒徬徨
引經據典兩故事漢定陶王宋濮王不考所生考所繼
太妃半路先流涕人情母子割離難官家擬作歸藩計
張桂規時竊上書敢將總統排羣儒爲人子者爲人後
先王制禮今何殊封還批勅至三四宮中火厄回天意

新都縣志

卷十五

藝文詩

三

溫語如卿考孝宗本生父母准前議曹史無端有吠言
相國飄蕭返故園孝宗忽然作皇伯二百餘人左順門
公學程朱兩夫子冷褒段猷安足齒撼門大哭驚宮廷
拚與諸臣同一死碧鷄金馬峙天南憔悴風霜總自甘
小小肩輿容出入孤臣只合稱升菴扼之護之良有以
張公簡公托蘭芷九重心事尙難忘作達放顛而已矣
知交詩酒付門生尋梅問柳都關情豈獨文章橫蓋代
最憐苗夔能歌聲中間請急亦歸省恩恩往返多凄警
七十餘年荒徼身得見高皇猶骨鯁細參史乘及傳文

入門禮已殊箋文嗣位非子執初詔後來無怪滋紛紜
只悲敬皇在天上宗祧無主長惆悵公受三朝雨露恩
忍與羣奸窺意向處人骨肉良獨難婉詞激淚皆辛酸
勉君學舜學光武濟與不濟求心安一門德業聲華重
於今飛鳥盤翁仲滇蜀迢遙慘淡雲靈旗隱約鸞鳳控
臨安太守王探花搜羅遺蹟親梳爬惜不開雕拓萬本
人間到處餐流霞竭來賢宰知爲政鑿湖講學懸金鏡
禁烟携榼弔忠魂奉陪珠履多題詠中亭學博今吟壇
坐索詩逋倚畫欄李杜銷沉坡谷死每談雙桂摧心肝
那得臣心如此赤

新都縣志

卷十五

藝文詩

三

題寶光寺石礎

相傳僖宗幸蜀駐蹕寺中

塔上風鈴相對語此是僖宗駐驛所宋屋明墟歲月磨
老僧指點猶餘礎官家少小生宮中甘心臥起閹奴同
若輩知書尤狡獪乃公敗事喪蒙戎洛陽已報飛霜鏃
灞上甲兵疑草木金光門外野沙寒白馬星馳來駱谷
蠶叢開國峙西坤那有黃衣入劔門一從唱罷淋鈴曲
十二衛軍重騰翻此時葆羽駐蕭寺烏鴉強作鸛鸞侍

金剛努目佛低眉曾將法力銷烽燧迴首六王興慶池
五十萬錢一鵝兒左藏天齊都耗了更徵商旅行鞭笞
江邊雲樹苦卑濕嬪御飄蓬黯於邑關中消息近何如
又聽黃頭爭酒急勤王諸帥捷書來刺闥入奏天顏開
却收帳殿歸豐鎬仙李依然玉宇栽國家圖治在英彥
最放假手鷄皮面北司非比南司強廷臣未必宮臣賤
侯孟堂堂兩拾遺披肝瀝血旋捐糜小人怙亂相終始
裂尸萬段何補爲迄今此礎琳宮後不經薦馬和春白
土花繡澁蛟龍蟠似有神呵丁甲守我來訪古屢摩挲

新都縣志

卷十五

藝文詩

三

當年帶礪盟山河夕陽欲下不肯下蓼蓼殿角悲靈鼉

何孝子

雷聲砰礮電光駛火鴉萬道乘風起接引蓮花踏火開
雙手來迎何孝子孝子水保十三齡有母在堂病未已
父也離家子力綿餬蕭生活謀甘旨忽然比戶黑烟騰
東奔西突紛填委孝子負母母否否兒急逃生休留此
兒號出求救人人方救已兒再入門倉皇無計以身抱
母與火相抵祝融奉帝命萬古劫灰爾汝有王祥孟宗
之心腸介推文山之骨髓命坐火星非水可瀰火地翻

身火池漱齒皮囊粉碎何足論帝勅六丁付青史噫吁
噉孝子豈圖青史名精誠所結拚一死死如孝子子道
止生爲人子可知矣

余女魏貞婦行

女新都人幼字魏及笄而魏殤女聞哭之慟易服請往經紀其喪且

事翁姑翁姑以貧辭女曰女紅可活也遂留魏都人士憐之釀金以成其志

紡聲裂斫地起我真魏家媳婦矣魏郎死二親存代郎
養親郎色溫上言莫愁貧女紅能活人摒擋家計唯兒
身北風何蕭蕭吹恨入寒潮明月何皎皎照此閨中髻
天荒地老鬼神號願護貞女長光照

新都縣志

卷十五

藝文詩

三

寶光寺唐僖宗幸蜀行在

張懷溥 雨山

塔影高參天香雲周匝地訪古到叢林鵲噪知客至老
衲偏袒迎指點說前事緬維唐僖宗於此曾駐蹕李花
十八葉顛風吹欲墜繫毬狀元郎金甌賭一戲一擲輸
三川已作西幸計金色怒蝦蟆渡淮誰設備偃蹇高千
里縱賊一何恣能用沙陀兵何致東都棄唾彼田軍容
而以腹心寄召募到市人朝事那堪議臨危授賊官鯨
鯢不受餌堂堂張金吾迎敵首自媚長安十萬家望蜀
遙灑淚是時西方佛不救天心醉空聞玉座前有光生

舍利遺礎至今存花雨點空翠憑欄興未闌夕陽閃鴉背欲去緒風生鈴聲話興替

和新都明府楊芹洲先生清明弔楊文憲公墓詩
文憲碑高龜剝落誰向墳前薦春醪芹洲先生政多閒
花時載得新醅熟弔古詩傳白雪音憐才心到丹鉛錄
豹房龍去痛弓髯天潢派近惟安陸大行遺詔太后言
皇天后土臣民福國家有統斯有宗旁支入繼準陶濮
臣毛臣蔣無異詞是父是子同啓沃當年此論本程朱
幾時新議參璵萼逢君之惡法當誅敬皇在天靈奚托

新都縣志

卷十五

藝文詩

三

盈廷抗疏各錚錚修撰仗節尤諤諤三十七日訐謨在
二百餘人同聲哭雷霆震怒死所甘冷段同升生更辱
身到南荒飽瘴雲夢繞西清聽鈴索扶病親提萬里戈
著書空滿三間屋明堂制作瑰瑋才蠻烟佚宕淒涼曲
可憐空閨錦字來讀到日歸愁緒觸夜郎曾放李謫仙
僮耳長羈蘇玉局從來遷客慣離憂自古美人半謠咏
九泉應憶秦陵園萬卷誰搜金齒作豈知隔世有知音
惜未生前逢此牧人間地主盡殷勤何處天涯有飄泊
當年江公與郭公并此而三古誼篤翁仲無言亦點頭

似此風流今所獨願將盛舉告將來一歲花開酌一爵

孝童曲

侯賜桓 漢州貢生

孝童何國興小字水保新都彌牟鎮人父廷愷母
鄧氏家極貧父出外經營道光二年童年十三父
欲携童遠出貿易童以母病需養力辭父遂止閏
三月十二三更後鎮被火延燒七十餘家火盛時
童出街遍呼人負母擾攘中竟無應者復入門欲
自負母出火已及門竟抱母焚死紳耆等據實稟
縣令尹春明立碑官道旌之余憫其以童年而能

新都縣志

卷十五

藝文詩

三

人之所難能也特賦詩以紀其孝

三月十三烈風起古鎮延燒夜不止平明檢點七十家
搶地呼天哭盈耳茅屋雖燬人尚存有人還算悲中喜
可憐總角何家童十三齡獨殉母死當其風暴火熾時
母病卧床難以徙街頭匍匐喊聲高援手無人痛徹髓
入門救母奈力微出門又遭火尺咫姑試已力負且逃
焦骨兩堆慘若此雙手抱母擘不開觀者如堵賴有泚
詰朝縣合賑災民亟買桐棺歛孝子吁嗟乎曹娥十四
殉父亡絕妙好辭非溢美赴火當不異沉淵嘖嘖孝童

自茲始王渙石闕鳥獸奇諸葛陣圖風雲壘乾坤不朽
名永垂鼎峙而三萬萬紀

弔楊升菴

戴天良

議禮爭將國體尊撼門一哭禍之根百年成竟留金齒
萬里生難返玉門著述猶多碑版在鄉園尙有墓廬存
我來不復瞻遺像祠廟空過夜正昏

新都楊文憲公墓碑歌

孫

纘

夢華
綿州

文忠功節韓富儔文憲博學淵雲羞隆然豐碑蟠鼉屨
迺在始康郭外城西樓行人過此駐馬讀欲拜未拜靈

新都縣志

卷十五

藝文詩

三

風肅驚湍滾滾聲東來疑是二百餘人放聲猶痛哭憶
昔豹房龍上賓武皇無嗣選懿親安陸外藩承大統以
名則弟分則臣太廟昭穆不可替皇考當稱敬皇帝師
丹議禮温公遵事關君父原非細撼門力諫大聲呼臣
等讀書宋程朱濮陶大義昭前史璉萼邪談敢面諛銀
鎗一擲赤棒響廷杖今將獄吏仰國家養士百餘年相
公父子何忠謹莽莽滇雲荷戟來蠻烟瘴雨逐臣哀千
秋忠諫科名稱一代文章典麗才點蒼山色浮空翠刀
環夢斷釵花膩蠻荒解重狀元名錦字多緘思婦淚山

花插髻粉斑斑老病孤臣朽骨還空傳醉墨楊修撰近
比琵琶康對山吁嗟乎文人遷謫無時無公之竄徙獨
何辜君不見夜郎李白儋州蘇

楊升菴故里

張懷淮 玉溪

君親大義敢糊塗痛哭天門不可呼躍馬功名前劫過
汗牛著述古來無胸羅星宿驚臺閣醉墨蠻鄉重袖襦
漫道南雲行役苦也會歸骨到新都

遊高比部繼園用杜工部遊何將軍山林十首韻

風動鱸魚與人歸駟馬橋新園戀泉石舊跡隔雲霄春

新都縣志

卷十五

藝文詩

三

水桃花引秋山桂樹招此窩信安樂容我共逍遙

眼漫逢人白談偏對子清香濃思化蝶春老欲留鶯花

促三郎鼓魚調五嫂羹就中尋樂好休賦出門行

人面山爭起巖腰樹亂支數峯危壓屋一徑窄臨池石

畫苔如繡雲埋洞不知尋幽忙屐齒芳草正紛披

莫話恩讎事雄心拂劍花儒冠頭誤虎生計足添蛇歲

月愁無那煙霞興太賒把杯還一笑醉處卽吾家

流水三分占珠簾一半開蒲恭低過竹石瘦遜於梅綠

樹遠相庇紅塵近不來春袍共搖曳錯認上階苔

蘭合同心臭芸添避惡香四時春不老三伏暑生涼古
鏡玉臺捧名花金屋藏支離笑松樹抵我鬢毛蒼
依林初闢徑鑿井又通泉障簇花園錦萍催柳作綿清
風常入座明月不論錢得到神仙地追陪葛稚川
秀發珠三樹毫飛墨幾池龍文團艾蒨蟹眼急鼠羅經
義師楊子名山拜歷兒一身落香國蜂蝶慣相隨
了髻風流在思君隔暮雲相知無下士所貯盡高文鴻
爪苔苔合騷壇壁壘分粲花纔弄古紅雨已繽紛
肯放春光去其如良夜何勾留燒燭短牽引得詩多下

新都縣志

卷十五

藝文詩

三

舍無彈鋏當筵且放歌錦囊付奴輩不負此回過

春日同劉春山遊寶光寺

四首錄三

著有松竹山房詩鈔六卷涂中軾 元伯

登壇歡覩佛進步合參禪古柏高於塔輕雲薄似綿頻
趨方丈地宛在大羅天話舊精神爽拈花笑拍肩
最愛空堂下新開幾樹花輕紅迷石徑嫩綠上窻紗地
迴風初定天空鳥不諱應知尊宿座卽是梵王家
呪鉢功原大登場不待招城高環雉堞夜靜吼蒲牢道
自空門悟禪從法界逃與君登彼岸同坐聽松濤

夏日同劉春山遊華嚴寺

涂中軾

入門風淡宕寓目景清幽共話遊仙閣同登選佛樓旃
檀花欲見琴鶴影常留大眾繙經至談禪石點頭
絕頂莊嚴地松風萬籟鳴敲鐘龍定喜說法鶴頻驚白
象山腰護黃雲指背生此間塵不染漱石亦心清
地僻宜消夏天高別有春蒼苔迷鳥跡老幹作龍鱗客
到心田淨人來眼界新金丹如果鍊修到定歸真
萬竹森如箭參差碧幹修青光常照眼綠蔭已當頭樹
大將圍屋花香欲上樓閣黎真愛客茶話久勾留

新野縣志

卷十五

藝文詩

禿

獨步寶光寺適成都故人傳省三廣文來寺留宿

話舊

有古訓亭詩鈔二卷

高明遠

靜一

古刹重逢信夙因別離四十有餘春憶君握管髫齡日
愧我論文弱冠身數到舊交今在少敘來往事記難真
對床風雨旃檀淨此後音書寄要頻

培修無垢寶塔

高明遠

秀聳曇雲北郭前殘碑猶認晚唐年腹中舍利真奇也
頂上霞光豈幻然赤岸南屏名共壽高臺東拱勢相連
宋明兩葺今重葺歷劫長新了夙緣

古榴樹歌

郭縣舉人前孫 澍
任綦江教諭

新都尉署舊為楊升菴宅有古榴樹一株大可合
抱根出土二尺即歧為兩一卧地屈走復人立高
出檐際一柯幹夭矯傲兀如龍花以仲夏月開至
十月不絕石屏朱丹木孝廉見而異之囑榆南張
少府為之記并琢石承其四隅高蔭山比部命工
繪圖作跋孝廉復為四言詩一章同人皆有作澍
賦長句

始康縣治桂湖陽舊是升菴雙桂堂香名屹立三百載

新都縣志

卷十五

藝文詩

四

桂失其傳無由詳老榴一株發光怪偃僂蜷相扶將
奇根迸逸裂厚土高柯佶崛穿古墻闐然出地方二尺
同本離立身昂藏一枝偃蹇形憔悴有如遷謫羈遐方
一枝作勢自振拔風前鼓舞如龍翔花開仲夏越陽月
珊瑚火齊交輝光明星曉日疊照耀蒼皮黛葉森披猖
梅菊無言桃李俗花如煥發皆文章公之精神若元氣
降為草木能流香員外作跋某作繪少府為文銘諸坊
朱君嶽嶽振奇彩四言雅頌諧宮商家世於滇公地主
今來親炙居公鄉

丹木時
館新都

賤子后公為里黨每懷恭儉

逮梓棗矧茲榴也及見公家全盛日腰金袍笏方盈牀
風霜閱歷歲月古丘燹不死神衛防雙桂森森後補植

國初詩老誇漁洋固知贗物等瓜蔓繫以公名難遽忘

王阮亭使蜀過新都有題雙桂詩桂後毀今二樹係補植盤根輪囷溯長養栽培不

藉人力強羣公花前雜攷訂高文磊落爭軒昂共登公

堂飲公酒芳馨馥郁隨風颺插花傳粉一大笑榴亦欣

幸如人狂一經品題價十倍懷公頌公此甘棠公昔嚴

譴赴六詔花開不來歸故鄉綠野堂空秋草遍烏衣巷

冷白榆荒異代相知還我輩樹猶如此人何傷噫嘻樹

新都縣志 卷十五 藝文詩 一

猶如此人何傷榴與公名日月光

貞婦吟 同邑魏節母苦節自貞撫孤成立柏舟之節詩人有不容混者作貞婦吟

范鳳臺

青青女貞木霜辰託遠岑不惜霜華冷持此故人心故

人日已遠春陽日已晚遺我三歲兒心長兒衣短山高

水無梁路遠車無軸來日當大難百憂煎我腹兒今青

松姿春風顏色好叢桂既森森清泉仍浩浩泉流山石

間山險石亦怒石怒有時平泉水清如故

桂湖五律十首寄張宜亭 安徽桐城人 姚 騫 仙槎

前哲遺芳躅平湖傍女墻登瀛推領袖抗疏植綱常雅

曲咸爭誦

升菴先生製
有桂湖曲

名區嘆久荒休哉賢令尹重締

會心堂

張君爲政好無事藉匡扶青眼頻投轄紅蓮久濫竿釣
游共晨夕觴詠極歡娛不識花開日攜樽憶我無

難得囂塵裡開門別有天樓臺皆近水風月浩無邊碧
玉千竿直紅霞萬朶鮮欲存山意思蓋石自幽然

勝地春偏早天然好畫圖穠桃紅亞水垂柳綠遮湖波
澈魚堪數風和鳥自呼此間容小隱更不羨蓬壺

新都縣志

卷十五

藝文詩

三

一棹烟波裡波光漾淺深野菱團水面老樹臥湖心魚
戲翻新漲鴉歸噪夕陰維舟香世界清磬出疎林

秋色艷湖濱桂花香滿城香風吹不斷冷露聽無聲撲
面心先醉當頭月更明芙蓉千萬朶臨水笑相迎

百本寒梅樹沿堤手自栽憶鋤明月種應傍綺窓開香
雪迷幽徑春風拂碧苔一枝誰折贈西望獨徘徊

乘興便臨眺流連常暮歸折花香在手灌樹綠沾衣柳
港藏輕艇春波沒釣磯我慚彈鋏者歌罷羨魚肥

更上層樓望平疇一帶齊犬隨人刈獲牛負雀耕犁村

樹綠圍屋菜花香滿畦循良重農事憑眺日沉西
一別沉霞榭重游白帝城暮雲千里共春水片帆輕政
事懷三異飄零愧半生短詩聊代柬用慰別離情

新都縣志

卷十五

藝文詩

望

附錄新都前賢藝文

新建宋丞相魏國張公父子祠堂碑記

楊廷和

宋丞相魏國張公浚在中興號為賢相初逃張邦昌之議平苗劉之亂其風聲氣節已聳動天下既秉軸毅然以恢復自任誓欲攘外誅僭以清中原表著天心扶持人紀引擢賢俊英材授任遠人何其用舍而進退天下占其出處為安危忠君體國之誠直與諸葛孔明相望於千百載上下雖困於讒忌屢起屢躓功未克就而志不少衰其子右文殿修撰棫穎悟夙成魏公教之一以仁義忠孝之實又受業於胡五峰之門其為學倦倦於理欲之分義利之辨朱子推之以謂大本卓然先有所見已非其匹學者稱為南軒先生嘗參贊魏公督府諸所綜畫幕中人皆自以為不及魏公寢疾時手書諭南軒兄弟曰吾不能恢復中原以雪祖宗之恥死不當歸葬先人墓左葬我衡山下足矣乃葬之寧鄉瀉山之南後南軒卒亦附葬焉至是蓋三百餘年矣墳墓所在鞠

新都縣志

卷十五

藝文記

器

為榛莽土人父老亦鮮有知之者鳳陽胡侯明善以名進士補合寧鄉一年政通人和訪而得之憮然歎曰合甲有之凡忠臣烈士有功德於國家及惠愛在民事蹟昭著者列於祀典其祠墓禁人毀撤若魏公所建立載在信史昭如日月正應合甲所著而南軒之學師表百世從祀孔廟達之天下今其祠墓在二邑者顧蕪穢不治非我有司之責而誰也於是亟取青蚨贖之餘建專祠各四楹其右則南軒書院又買田四十畝以備時享之用門廡秩秩繚以周垣俎豆載陳衣冠動色會衡山劉侍御徽持節按蜀過家見而悅之既至蜀以告予謂予魏公鄉後學也屬為文刻於神道之石且檄廣漢訪其遺文予惟賢人君子之用於天下不患無才而患學術之不足不患無學而患所學之不正嘗觀魏公之所以告其君矣曰人主之學以心為主一心合天何事不濟又曰所謂天者天下之公理而已必兢兢業業自持使清明在躬則賞罰舉錯無有不當人心自歸敵讎自服其本原皆自聖賢學問中來非漢唐以下規規於功利之末者比至南軒每進對必自盟於心其言曰此心之發

即天理之所存願時加省察而稽古親賢以自輔是即魏公之說也有宋一代名臣若范仲淹之於純仁韓琦之於忠彥呂夷簡之於公著前啟後承其詩書之澤事功之盛皆足以名當時而傳後世若學術議論視魏公之於南軒或有間也尚論於魏公客有責備之意而其大處終不可泯予是以表而出之觀者幸勿以予為齊人侍御君思賢尚友而樂成人之美縣侯為政而急於先務皆可書也故以為記

新建永昌府治記

楊廷和

永昌古哀牢之地置罷自漢永平始歷代多因之元務遠畧創立金齒大理都元帥府于銀生巖甸其地在今天千餘里是所謂金齒也後以遠不可守改為衛移就永昌府仍冒金齒之名其實非也我朝洪武壬申省府以其名併入金齒永昌兩千戶所收金齒軍民指揮使司永平縣亦隸之領之者衛官尙未有鎮守內臣及武臣也景泰中始有之朝廷悠遠文教疎濶上下交征日朘月削盡民之所納以地之所產不足以供谿壑之欲而民日益困戶口衰耗盜賊繁興君子士人咸嗟怨往往

新都縣志

卷十五

藝文記

望

言於所司欲復府治前此巡撫屢以上聞輒下守臣勸報各阿所好因而庇之虛喝彞民以必不可復之狀甚矣永昌之重不幸也嘉靖改元巡撫都御史何公孟春遂謀於鎮守總兵沐公紹勳巡按御史羅君玉席君春連章請革鎮置府議上報可遂改為永昌軍民府永昌人聞之室家胥慶相與語曰而今而後庶幾以生矣我有田畝我食我力無豪奪我者我也我有男女我婚我嫁無奢誘我者我也我有官守我師我帥無鄙夷我者也不圖今日復為幸民此新天子之賜諸守臣謀國之忠我子孫百世之利也未幾何公召為吏部或有鼓煽頑民欲害其成者都御史王公啟繼亟以興革之原禍福之幾撈於道路仍督籓臬重臣往殿之捕首事數人寘于法反側復靖御史傅君桂按部至永昌其土民具言府治未建人心且將惑傳君即日審勢定址計財糾工以內鎮守舊治改為之王公特檄參政鄧君相副使蕭君乾元董其事兩閱月而成一如他大府之制法所宜有罔或不備永昌至是真大幸矣布政黃君忠遣人來請予記夫天下事謀之在同成之在斷而運之在機自永

昌之人病於兩鎮之虐也凡有憂民之心者孰不欲更之而議或不協久泥於時勢之難為固有獨倡而無和欲執而不能者聖朝更化百度維新何公首主其議王公成之而鎮守巡按藩臬諸君又式克相之是以一興革間而惠流遠徹功施無疆信乎運乘其機而謀與斷皆善也抑予徵之漢事永昌太守鄭純為政清潔夷俗安之書於史傳至於今誦之不衰此則近日守臣建議慎擇牧守之意亦後來者所當知也府之復其事為重故詳記之若夫經營之役固在所畧云

重修杜工部草堂記

楊廷和

成都草堂唐杜子美舊居之地也堂屢廢矣輒新之者重其人也子美出處具在本傳堂之興廢亦各有記載不復以云今日之舉則巡撫都御史鍾公蕃倡其議巡按御史姚公祥主其成而鄭公宏協其謀也既成成都府同知吳君廷舉以書與圖來屬予記之蓋翹然而起臨於官道者為門門之後為祠三楹遺像儼然春秋之所有事焉者也祠之改作鍾公實委郡僚任之於時以

新都縣志

卷十五

藝文記

吳

公帑無羨餘未遑其他他日姚公往規之則以為他之不葺又遺後人以郵是其責在我再合郡中檢括所藏乃以兩巡院所沒入者益之藩臬諸公亦各助之十一其左右各稱是引水為流橫絕其後橋其上以通往來於其前門焉榜曰浣花深處進於是則草堂也堂故在院之前來遊者雜然謹譁弗嚴也姚公乃合易置之院後隙地盡以屬之堂而規制益宏矣堂之左右亦各為屋三楹其東則選釋氏之徒居之以奉祠之香火其西則禮神之器與延賓之具皆貯焉繚以周垣廉隅有截又其東偏為池引橋下之水注其中菱蓮交加魚鳥上下相樂也名花時果雜植垣內盆池楚楚離列其間其外則樹以橙柳象子美之舊也經始於宏治庚申之春斷手於其年之秋財不費而功侈民不勞而事集凡此皆吳君圖之而受之姚公者也夫世稱子美者概以為詩人愚嘗不滿於是以謂詩道之成極於子美而子美之重於人者則不獨詩也唐三百年間文章之士母慮數十百人而祠於後者僅可指數李白之於采石韓愈

之於潮州是其表著者他若襄陽之孟亭建州之黎山之類則有知有不知者矣而子美之草堂夫人皆知是獨以其詩而已哉蜀自先秦以來上下數千年間古人通祀者纜數人若秦之李冰漢之文翁孔明宋之張詠皆以功德流遠比於甘棠是以蜀人若是其慕之也而子美徒以羈旅困窮之人軒然與之並是誠不獨以其詩也蓋子美之為人孝友忠信大節具備讀其詩攷其素履一一可見觀其舜舉十六相身尊道何高秦時任商鞅法令如牛毛之語則其用處亦畧可知史家不能不過稱之為文先生耳嗚呼此何足以知子美哉不知於當時乃知於後世一世之短百世之長子美之名若草堂雖與天壤俱存可也今日諸公之舉尊賢厲俗其於風教豈曰小補之哉諸公之蜀皆卓有風烈可傳於後記為草堂作也故不具述董是役者自成

遂寧在唐宋為府為州廢置不一其改為縣則自國初

新都縣志

卷十五

藝文記

畢

楊廷和

始學宮之設亦自唐以來有之初建城南既改而東宋嘉泰中又遷之書臺山下今禮殿遺跡尚存勝國時朔建講堂及稽古閣既而殘於兵洪武四年知州事者復之歷宣德景泰間修葺者再至於今宏治己未又幾五十年矣治之不時日入於蔽諸生私憂之因教諭戴顯張彬梁性以白於巡按御史曾君祿令改為之仍許以公帑餘材給其費會武陵丁侯護以鄉貢進士來知縣事慨然以為己任曰是邑合之志也不得以厲民為辭復請於巡按御史姚君祥得報如會之初丁侯以公帑不足辨亟捐俸為之倡參佐以下皆助之邑之好事者又助之既具遂集百工而命之曰某所大木可材以屬而攻木者某山石可礎可甃以屬而攻石者某土可陶某林可薪以屬而塿埴者取於官則優其力取於民則優其直心畫指授如營其家乃飾禮殿及於廟廡門於其前櫺星巖巖復飾講堂翼以兩序舍於其旁師有安宅稽古之閣尊經之亭增卑為崇廓隘而宏亦再踰年既崇既好校工考程不愆於素丁侯於是率校官輩釋菜而落之退坐講堂進諸生語之曰是役也惟諸生之

始謀及邑人之勤事以有今日有司之責亦已塞矣而諸生之所為學則其責有重焉者予不佞不敢為他辭請徵諸遂之故因指堂下之栢而言曰是遂之先正張九宗實親植之以遺於今者也夫一草木之微於學事無或損益者徒以其賢者之手澤也然且愛之不忍去也況今日之所誦說者孔氏之遺經聖賢傳授心法之所在用之修己治人無往而不為益者而徒假之以取榮而終棄之可乎遂之先正又有傳公耆者常受業濂溪之門與聞性命之說晦翁亦有慕焉而屬其門人度正以訪於其子孫今其流風餘韻或者尚在也顧無有聞之而興者乎凡此皆聖賢之所以為教而諸生之有事焉者若徒以科第而已則自唐以來遂之題名於石者毋慮數十百人而何其聲烈之不盡傳於後也諸生再拜曰大夫之言是也敢不勉焉以求進於是遂之仕於朝者戶部郎中王君勤監察御史黃君珂余君本實具述其興事本末並丁侯之言以告我請書於石遂為記之

新都縣志

卷十五

藝文記

哭

李指揮孝思詩序

楊廷和

予友雲南按察使王君行之寓書於予亟稱衛指揮李君秉昭之賢比以閱試來京因鄉進士劉朝重造予予一見異之信行之之言不失也朝重復為予言秉昭之為人事親能養三年之喪動必以禮比塋廬於墓側朝出治官事暮歸宿於其所御下嚴而有恩政成無賄蠻夷悅服嘗值歲旱禱雨輒應合穎之禾連穗之麥屢於其封內見之部使者數旌其能或問之則曰此非燧之能先人教之也燧尊奉遺訓猶恐無似以忝世德於是問者益賢之其歸也朝紳諸大夫皆賦詩贈之題曰思貽蓋有取於記禮者亦秉昭之意也夫記之所謂思貽者有二焉曰將為善思貽父母合名必果又曰將為不善思貽父母羞辱必不果二者皆是也出乎彼則入乎此秉昭所以貽其親者可謂有合名而無恥辱矣夫名非君子之所尚也君子為名譽而為善則其為善必不誠秉昭思貽其親以命名則是非以自為也其為親也是豈非誠於為善者哉天下之善一也以之事親則孝以之事君則忠以之治民則為良有司而治軍旅則為

良將皆是物也蜀自近年以來邊圉多警盡一省之財力屑越於區區股掌之地而戰不足以爲威守不足以爲固是皆將領之責也於是乎有吏議焉有軍刑焉蓋亦羞其先人負其世澤多矣使皆有秉昭之思貽之心則其債事豈至是哉秉昭行且有將領之責者也故因詩之序而有是說焉語曰惟善人能受盡言秉昭其必有以受此矣

資政大夫刑部尙書致仕杜公銘行狀

楊廷和

公諱銘字敬修姓杜氏成都金堂人杜之先本出於堯周成王時有封杜城者因氏焉自杜洩避季平子之難奔楚三世至杜赫爲秦將軍十三世而至當陽侯預又十一世至膳部員外郎審言家於鞏審言之孫爲工部員外郎甫避難入蜀如衡湘其子宗文從宗之子復還蜀居青神號東山翁其後又有散居旁近邑者公其甫之後也曾大父諱興祥葆光不仕大父諱添禮父諱榮聰俱以公貴累贈資政大夫刑部尙書祖妣張妣某俱

新都縣志

卷十五

藝文記

吳

贈夫人公少有異質從鄉先生治尙書舉正統六年鄉試十年第進士授刑部河南司主事論決輕重能盡法意自尙書以下皆器重之總三十司章奏羣僚堂叅時有疑獄不決者皆聚而質於公如公言所治獄輒稱善歷階員外郎郎中他司郎中缺公嘗兼領其事至晚他司吏往往抱三四印歸公家公愈謙退不伐衆益賢之景泰六年尙書江公淵巡視南直隸河南山東等處舉公自輔有持身端謹事體精熟之語公感其知已亦克盡力未幾奉璽書慮囚貴州出滯獄數十百人貴州人謹傳以爲神丁楊夫人憂服除刑部移文吏部仍願得公爲屬且奏請於上遂復除河南司天順四年甘肅邊遞告急朝命兵部尙書馬公昂行邊復舉公叅議幕府已得請因事不果行尋陞雲南按察使司副使誦職吏剔弊政聲稱崛起未盡一年會有誤傳新任按察使司呂困道卒者守臣交章薦公補其處遂授試按察使司已而呂復任乃改公於貴州真拜按察使居三年部布使列上其風績請表異之陞湖廣左布政使湖廣爲東南大藩最號繁劇公裁決庶務宣布德恩治行稱異等

成化八年召爲戶部右侍郎比至京陞工部左侍郎未幾轉刑部十一年按事襄垣王府未還會虜自黃河套入北邊寇抄朝議舉大臣提督山西三邊軍務僉謂莫如公者遂以命之公出代州歷雁門寧武至偏頭關徧行邊壘覽觀形勢時時召老兵退卒問以攻守之法益市馬募兵補完虛籍因建議徧頭關在山西窮處東連威遠西帶保德北接虜境猝然有警戍者出戰便爲虛邑宜設千戶所一領百戶所十就以戍兵願留者實之又言三關兵民雜處事多牽制官吏乾沒於豪家勤卒占役於私室請置按察副使一員督治之俱從其議又於要害處設土篷堡之望高視遠二墩久之虜知我有備遁去乃還朝奉旨審錄罪囚有白金文綺之賜十六年按事寧府其還奏時人謂知大體明年以父憂去官終制仍舊任二十一年秩滿九載加正二品俸尋還工部尚書掌大理寺事故事拜尚書者率上疏禮辭公曰事君貴誠虛讓非禮也獨不辭公自刑部轉大理其所駁正一裁以法不嫌於專時論多之明年改刑部尚書憲宗皇帝在位久明習政事尤慎重刑獄公時教飭其

新都縣志

卷十五

藝文記

五

屬吏以人命至重勿以喜怒用法度足以正邦典而彰聖德一時用刑號稱平允明年以年至乞休優詔不允今上龍飛又辭得旨朕初嗣位卿宜勉盡部務輔成治理豈可引年求退未幾再辭上重違其意乃許之賜寶鏹二千貫仍給驛以行公卿大臣設供張祖道崇文門外觀者榮之既至家稍葺舊屋買田以爲子孫計燕休之室扁曰敬齋兄弟賓客日過從爲樂當春夏時扶杖從一二僮子課家人田作田父野老皆携酒餉公公爲引滿不辭人人感德而去刈時獲時亦然間入會府藩鎮諸公皆趨候之公不任拜起之勞輒復還金堂優游林下者蓋十有餘年近世蜀中大官壽祉之隆退居之樂如公者不多見也公久典獄事明於法令而持中不苛惡賊深巧詆者善決大事諸司屬抱文書立案下羣疑滿前公徐以一言判之曰某當然退而相與議無不以爲然者皆服公之精敏絕人其爲侍郎時貴州畢節衛人有告都指揮林晟與其子雄不道者謂反形已具或者又從而張大之欲因以爲功朝廷遣科道并錦衣衛官按其事公謂使者曰我故嘗官於彼晟之蕩侈有

之若他謀可保其必無使者既先入公言至彼按之果無所得晟父子遂得減死已而晟聞公之言密遣人致重賂謝公公曰我為國法耳豈為汝家計哉峻拒之一無所受公天性至孝事尚書公左右順承不違其志侍兄剛及弟欽友愛篤至從子亮紀浩俱撫教之以底於成得官皆至縣佐公氣貌魁頤與人交誠信可伏問口見心不立城府雅尚儉朴居家常衣布衣其夫人常謂曰公以大官被服如此得勿近陋邪公曰我故布衣在官服官服居家如故何不可之有其自用雖約然至於周貧恤孤則惟義是從多費不吝也其女適漢州牟鳳鳳死往弔之載棺及殮具以隨謂其女曰此我為汝未亡人計也見者服公之高公卧病餘一年一日少間具衣冠端坐召諸子曰吾入仕自壯至老勉於忠孝始終保全至此若能讀書為善不使家聲落莫吾死瞑目矣言已告終已而復甦踰時申前言乃卒實

宏治九年七月六日也春秋七十有八

祭黃簡肅文

楊廷和

新都縣志

卷十五

藝文記

三

亦疏直斯焉取斯謂是同德迹不必同或外或內或合或離合不數歲離不以間合不以隨內亦不泰外亦不咨英英蜚聲始於為縣歷陟上卿一節不變寧夏之關八事首陳陳兵河東先發制人逆濠請衛卒不與署謀國則然豈惟身慮後我而任先我以休優哉游哉巖山之陬疇昔之歲嘗與公約我且歸去過公為樂公當逐我東津仙觀日月幾何成此悽惋公善為詩亦復好之不欲示人惟以自怡公不善飲客至輒宴笑歌劇談終日不厭交半城中多知公者投分之好豈獨嫺姬帝亦念公乃厚其終簡肅賜諡卹典則隆刻銘於幽我辭無媿詠以斯文

生芻莫致

聯雲棧賦

楊廷宣

已卯之歲時方冬矣臘云莫矣余年過賈生學慚董相怔怔營營內不自定由是謀邁于行載言北征擔簦負笈陟岵拔阻攝穹隆控青雲扣天闔順風而稱曰肇元黃之既判兮迺陽浮而陰橐嗟大塊之茫茫兮孰則排而山鑿帝既設此靈險兮余總弗聞乎棧閣肆皇圖之

廣運兮都形勝乎燕漠眇蠶叢之建國兮隅星分乎井
絡聯秦帶蜀方五百里兮繚咸陽以爲郭阻褒斜之良
隆兮擁岐嶽之巨壑推隆理與替墜兮亦槩聞乎往索
良既策羽以絕望兮委回祿以燦灼何退身而驚擊兮
思駕馭乎帝畧迄超漢而歷楚兮遂用建夫三恪陽中
路以迴車兮紛不爽於髮膚白發嘆而長嗟兮意深諷
乎彼夫憤儀圖之詭秘兮誑金牛以爲訣憫元帝之遵
駕兮忍蛾眉而西趨侈御愛之仙蹕兮瘁萬乘之玉軀
蓋其危也足以駭駭巨麗而其至也不亦爲禦侮之天
區夫山本其奧也石備其崇也水出其蒙也盤紆突兀
岑崱嶽峯頽洞深涯蒼蔚第鬱天之所生也地之所產
也烏不得而翔獸不得而逸四時變化剛柔錯摩交構
乎其中終始乎其內其雲則黓黓黯黯雯曇衣被膚寸
漸深候於木末遠視極黓邇之則黓薰於石礪黓於深
谷霰黓淹流氛氳隱約霽幙屯需落落寞異於常態
其雨則津津洑洑石潤林響瀑布滴珠滿壑盈瀨霑濕
霑霑與地潛通豁徑注流煙樹瀟瀟松膏林沫淖淖踞
踞病於逆旅其風則飄飄颯颯轉山循谷料峭鬻發颯

新都縣志

卷十五

藝文記

至

颯批亢巽二乘虛峻峰高颯平抵微颯颯落木寒颯
切肌石尤激射打頭周回延歷萬象莫之可捕其日則
黯淡蔽虧斜景過雲東閣西隅窺於中天曠昇晦冥翳
皆醫難未嘗昭晰其風俗之所習土地之所宜余故得
并吞其所經歷包舉其所問答而囊括其語焉於是
五德公子導余以喬關兮嵌雲路之巖崑據嶺嶠之扼
塞兮羅萬象於景從聳嶺岍之嵯嶻兮怯衣繡之乘駟
盤七曲而腸迴兮眴高目之眈眈瞰龍江之翠翠兮瀉
白練之霓虹余既登此絕嶺兮瞠乎前觀藐乎後視拾
級坎壈聯步錯愕怔忡悸駭倦而色勃久而後定迺渡
水閣馳青橋涉凌兢而惘惘兮列御風而憑空側身弄
而撒捷兮足秦法之重重嶓飛棟巖巖嗟兮伫浮柱而
增崇截王孫之便給兮礧礧而青葱靄雲樓與霧蜃
兮比朝莫之仙蹤櫂不足以爲術兮憫征夫之溟濛儂
鞫躬而進登兮殆郭駝之形容駝丹梯下峻坂兮擬抱
甕之忡忡亦既身倦而神罷兮延偃息乎崖慵慵未極
也訊往路以前山兮越馬道與武關參差巷路偪側狹
隘騎不得方人不得比吁嗟乎其赤帝之所興首咸陽

以入關兮降子嬰而要盟羽不得而爭驅兮適自茲以
為兵故稱名為劉垠兮意非此莫之與京因是以孟遊
乎與屏兮閱千古之芳林於是其有凌煙大夫挺瓌梧負
霄漢迓余而言曰翳前林之直矗豈非皇華之岐嶷楸
檜障以蔽天兮鷗南溟之翼旃旒猊龍之蹇兮雜選糾
會之標枝蕩日月以扶疎兮榦輪因而參差杞强梁而
麗霄兮樗擁腫而鴟夷楊到偈而膚敏兮檉垂身而委
隨節美秀而喬修兮紛篁籟之陸離目極望而攢睨兮
何摧唯而鬱伊悲落木之蕭蕭兮恣行人之浙吹風雨
晦而濤起兮響萬壑之隆墀余稔遊此室窈兮管窺天
而冥疑馳豫章之絕榦兮鴛鄧圃之平騎帳梁棟之齟
齟兮雖牛山其何為彼其衆夥之富山桃石榴燃柿苦
李小棗棹柰楂梨棗栗斂朱榮秘生意錯綜懸岩潛隱
乎其中不可殫述由是踰三盆窺姜嶺山益進而窺岌
樹益窈而縱橫憶岐豐之盛瑞播攬德之美名於是自
綠衿使耆麗質修儀且逡且巡其氣也渴其志也恰巧
隙直前槩括以此山之靈昔寶雞之耀羽兮托千里之
峭嶸惟樊籠之我求兮窮巖巖而多縈彼蒼鷹羅鷲紛

新都縣志

卷十五

藝文記

五

修翎兮屬玉交青鷗鷓鴣駕鵝晨風子規灘鴻鷓鴣白練
沙鷄錦胸繡臆累黔啄兮羗有萬而難拜鵲占歲而音
妙兮鳥散聚而時鳴鷓鴣宿霧而懷寶兮鳴呼類而為盟
雉招搖而曳尾兮鳩思婦而藏聲鶴獨立而不懼兮鷓
依稀而將迎鴻漸達而自得兮雁避北而從兄其他角
毒之屬又未可以須臾傾蓋而語班荆而坐對也聊舉
虎豹羣而晝哮兮黃熊慢而遷延狼跋胡而恣遊兮豪
豬放而盤旋猱嫵媚而先後兮狡兔逸而長便後貌茁
而豐茸兮麋鹿吻而雲眠鼯鼯幻而躑躅兮狐貉衛而
自賢余因聽此富擬上林靡適長楊公子王孫有智不
能以施劉磻羅弄有術不能以張王良何以歆趙主造
父何以駿周蹄徒縻思於行李噫何補於拳躋既騁草
涼之墟復背東河之西尖巒又呀溢若虎關凌遲委蛇
下若抃鳥崔嵬嶠嶠守若扼吭宋代之賢所以遏元兵
而一時之雄終不能向南鄭而窺也可不謂之壯哉天
地設險高則為山深則為水山之所峙水之所流余又
見夫元冥先王之為費也濺洶濤泛瀆瀆出崎嶇走澗
漲隨余馬而犇流諒余行而相望岌岌乎譎哉詭哉滔

滔乎汎哉灤哉南通沔漢北入汧渭粵衆派之汎濫兮
觴礫碌之彷徨經透邈而迅駛兮礪從憇而鏗鏘碎震
電之憑怒兮嶸萬夫之阿房砥中流而瀆潰兮沸狂怒
而溢湯霈幃蓋之澄澄兮恍白鷺之翱翔凜三軍之旋
凱兮搖甲胃之鐵裝撼韶濩之夜嗑兮奮馮夷之擊鏜
灑雲根之溜篆兮濯白玉之琳琅邁蚪蚪之灑灑兮神
太史之籀藏三江駭而奔鯨兮穀洛闔而非常瓠子決
而訶泮兮呂梁隘而飛浪未有似此之崛吻翻溢逐觸
騰驤况其時也竺寒凝嶺洩凍阿僵冰崖珠絡雪巖瑞
光人思挾纊之主屋存獐豕之霜皎皎皚皚堅強強
此亦過客之壯麗奇觀也瀟灑拂鬱滌汔腎腸喜溢眉
睫樂忘故鄉已而望秦塞之渭縈瞻太華之麗麓水東
去而長辭翠漸微而山促嗟乃平原之易地豈非前代
之雄都乎余廼繫離懷於山水寄餘情於巴蜀障庾規
之塵窮阮宗之躅薊門煙月蘆溝曉昱輝煌乎帝里蓬
萊乎京屋世態無常天時又速余於是復冬往而春來
兮殫未盡之芳踪忽寒暄之易劑兮訝風景之靡同嵐
開障麗石滄灘渾鱗鱗出沒鱖鮓鱓龜喁喁族族別孕

新都縣志

卷十五

藝文記

書

鮪鯢獺入水而四捕豹向岩而懷吞余始驚夫昔者之
道而今者之溫故夫路菞菁以彌深山爛熳而舒容百
和異香徐來應風蘅杜苣蘭綠蕙幽薜薜蕪菑黃山椒
蓀萇有質無名殆不可窮藁本射干石芥苾芘薑温韭香
菜赤根水芹豐蔚之盛何其隆歟若夫寶藏之興太守
夜懷六奇反間熠燿繁光生乎古曠類乎石國則鳳車
之產也黑金巧治積薪而鼓銀鍊成鋼許子之所耕而
晉國之所賦近代求猿伐木披荆又有夜光布網網牽
百里則安山之奇也玉版雲英非濤非倫燦如白雪賦
如滑肌咸陽不足論其價山陰不足供其資西蜀賴焉
三秦給焉則武關之藝也伊所居之棟宇兮樹版屋以
層豐隨凸凹以傑僂兮無風雨之暴傾飯土銅如上占
兮然松膏以爲明性剛勁以質樸兮讓齊魯之蜚英玃
雲水於上山兮燒石田以爲耕穡種稂以有秋兮兼芋
椽與蔓菁其官府之所寓舍則譙樓麗棟盛鶴搖鈴重
門雙闕井幹華程黜聖壁飾後寢前廳無菑無害庖食
具精勞乎遠人達乎帝庭其衣冠之耀則祿不易常用
其武弁間以流宮統以方面毋暴毋忝考其勤倦撫其

人民而庇其所縣嗚呼皇風清穆今四海無虞山川奠安兮草木茂殊我生值此兮何德之腴余去故鄉千里兮獨襟襟於茲岫以高山為知己兮以流水為鍾期以喬木為朋友兮以道路為箴規名不見成功不可知手胼足胝化不轉移揚雄為之解嘲崔駰為之達辭齊師幾比卜玉屢齎惟守道以自全恐辱已而為嗤余故得假息於姒狄之館沉酣於吏部之酤先生見而嘔噎使者候之以長吁大夫腹非於其側公子反唇而抑揄噫嘻何吾子之倥偬兮勞不憚於僕痛荷一往之足訴庸再來之可乎彼一握以為笑亦焉知吾之為吾匪區區之宦轍抑以覽聖世之皇圖未敢擬司馬之遊不亦異博奕之徒非聞子言孰策余駑言以足志竊效漢儒廼相與忘形共賦於開山之途

資陽縣重修縣治記

王閣

資陽即古資中為成都望邑勝文物樂安阜久矣縣治重修謂何罹水變也伊誰之為秦魯泉姜侯也侯蒞是邦政善民悅王寅夏五月大雨念五日泔潦漲溢浸入

新都縣志

卷十五

藝文記

三

城中人心洶洶懼非德水侯始則正襟默禱願若王尊之固金堤既而觀變行權功過邨相之濟漆洧他弗遑郵先取邑篆懷之募舟屬筏詔我資人速渡以濟越三日水落城垣四顧傾圮公署廨舍及諸祠宇漂泊摧陷特甚此或然之變而君子之所隱者侯馳報之餘夙夜省惕維茲成邑一朝蕩析厥咎誰歸不圖所以更新之何以居政而臨民哉乃以營繕之計謀諸士民父老喜樂從之遂度公帑之積估計經費合若干請於兩臺諸司獲允復與僚佐僉議某所增修其已廢某所應創其未有其費當用三之二某所釐其舊緒而新之其費當用三之一調用已審分役辦材命日肇功城垣保障重繫也屬之王君節板榦畚築不愆於素自臨津以迄環秀計一千一十三丈盡復郭溫之舊矣自此縣治次第有作若儀門若正廳若石唐韓侯新建後亭舊貫可仍特加修葺爾廳前面立抱亭旋遶規模深邃左右置六房廣吏舍若干楹儀門內左右翼以廓宇以外東西為預備蒼增補若干楹倉之後防守房監禁房各八楹馳道中起甃石工緻兩旁植木聊取蔽芾之意大門外圍

以高墉限民雜擾疊石作基氣象森偉如書院制旌善
申明亭各八楹里長兵快房共十九楹縣正邸宅前構
堂四楹後起兩丈樓以防水患左右翼室皆有重垣以
肅內外樓之後因隙地以鑿池花木魚鳥對時而育足
為退公休暇之所東西兩宅門宇堂室亦各有差臨街
則布石作臺可丈許左建鐘樓右建鼓樓虛其中豎坊
表一座與樓聯絡鈴鐸鏗然丹雘炳煥規制崢嶸一邑
奇觀也凡此俱藉子來民力耳秋毫一無所犯他如祠
廟社壇分司府署書院等處有其舉也無或廢也綜理
惟密又如此功告訖儒學教諭裴陵漢訓導王秉元重
其事鄉進士熊子祚狀之廩生詹榮鄒可屬予文以筆
之石夫凡是建立匪人莫為忌者涉於多嫌怠者安於
尸素不知春秋之法用民力必書舉事得其時制者亦
書之侯抱先憂之心適用之學任事之勇當務為急古
所謂能其官者也悅道一施民心樂勸尤不可易及者
語大義顧可泯泯焉而已耶載觀黍苗美謝功也今之
役慮遠而利於民一舉有眾善焉衛安之功宣化之益
保卹之義經制久遠之道百姓日用而不知也是宜記

新都縣志

卷十五

藝文記

美

之以詔將來後之人有思侯之風者於是乎
有所據矣嘉靖二十二年夏四月既望立石

吳江月下泛舟

明趙天澤 邑人

餘霞斂遙岑微靄生近浦江行得良夜月出鳴柔櫓茫
茫天欲流歷歷星可數水螢明乍滅沙禽或翔舞此意
誰與同三高渺千古

和余子俊元武山聖泉元韻

楊春 邑人

丹崖翠壁接雲巔元武西山湧聖泉一水靜中拖綠黛
萬松深處響冰絃登臨恍訝崑崙頂倡和渾疑太華前
緬想昔人增感慨數聲啼鳥度晴烟

秋閨

楊春

郎在天涯妾在樓西湖楊柳又三秋郎心不及湖中水
城北城南宛轉流

送周少宰秦府分封

楊廷和

少宰分封錫命圭寶函新册爛金泥恩波入渭天潢近
使節臨關華岳低銓事暫離宮內外民風兼問陝東西

皇華驛路馳驅暇雅興猶能及品題

楊廷和

送神武蔡千戶致仕還湖州

神武掛冠歸舊隱赤松相伴話長生車前紫氣青牛引
天上新聲彩鳳鳴軍務不惟繁白戰鄉關何處是烏程
太湖合是逃名地畫舫絃歌自在行

秋林驛

楊廷和

桃花溪水繞山流半是黃沙涌作洲瘠土幾灣剛有麥
平林一望更無楸今驛名去楸從林鎮改絃歌雅俗從今換
謝韻韻少桑栢生涯不外求好寺欲遊遊未得賞心聊
寄驛前樓

鹽亭縣

楊廷和

幾番寓宿鹽亭縣未得閒情一賦詩土俗舊從張老變
驪人舊多變語自高山曾受杜陵知杜詩高溪深野
水流雲氣雪壓寒條帶玉姿夜向德星橋上望仰高鄉
衮有餘思德星橋二

鹽亭道中

楊廷和

成都此去未為賒土俗看來亦自差驛卒裹糧多橡芋
鹽亭煮井半泥沙雲中石路依山轉澗外畬田趁水斜
剛到富村風景別竹林松徑是人家

隆山道中

楊廷和

新都縣志

卷十五

藝文記

三

西山褰裳渡梯石上雲嶺護持集眾力牽送引修縷盤
旋幾百折歷覽可千頃鳥飛皆下風雲過欲摩頂高樹
小於拳溪田望如井念此僕夫勤泥塗沒雙脰慚愧我
何功勞人自深省

猴山道中

楊廷和

古店北來皆鳥道驅馳今日又猿山軟莎歇馬蹂新碧
老樹盤蛇蝕舊斑直上有天疑逼近周圍無路可躋攀
勞人我亦勞神久一見郵亭一解顏

贈劉春劉台

楊廷和

君家兄弟好文章經學淵源有義方奪錦兩刊鄉試錄
凌雲雙立解元坊大蘇氣節古來少小宋才名天下香
從此聖朝添故事巴山草木也生光

夾江縣探原洞訪張來儀

楊廷儀

洞口花開鳥弄音石門間鎖白雲深韋編一卷石床上
卧看乾坤造化心

華岳樓

楊金吾

三輔望中收西風白帝秋河聲騰巨野岳色護高樓我
亦烟霞侶將為浩蕩遊雲間高卧者踪趾至今留

秋日登華嶽

楊宗吾

登臨岳色眼中收，况是西風北帝秋。翠插三峯星斗並，黃浮一線古今流。金莖露浥仙人掌，石髮雲梳玉女頭。我亦殫霞物外者，山靈應許再來遊。

壬寅秋余遊太華以風起不能登絕頂

氣爽金台始，來攀金天峯。於時雨初霽，白雲微溼濛濛藍。輿千里日澄朗，豁眸已睹巨靈掌。石勢崢嶸盡削成人，無猿捷易由上穿。雲白轉青柯，坪牽蘿挽鑠魂。屢驚千尺百尺峽，連嶂險絕如井窺。天行峽上有山立如礪，懸崑路垂一線細。人傳溝是老君犁，仰看登者如空繫。中分日月列雙岩，三峯九戟參差排。龍嶺蒼蒼狂飈起伏，惴不敢移青鞋。舉頭知與清都近，帝闕高結五雲暈。莫言未到洗頭盆，奇遊至此覺羽奮。

新安道中

國朝周國器

詰曲羊腸道，征車出漢關。風來堤外樹，雲起望中山。疲馬獨吟苦，野人相對閒。麥苗春正好，驛路慰衰顏。

謁魏鶴山先生祠

楊鳳庭

鶴山先生起宋時，我為童子早聞之。名賢去居本未遠，

新都縣志

卷十五

藝文記

五

臨老纔謁夫子祠，人門松檜竟何有。夏屋空洞清風吹，但聞呶呶若簧澁。諸生戢戢寒，惟先生講學自弱冠。濂洛洙泗心，摹追著書百卷神。鬼秘元精翔賁星，斗維聚徒授經陋。融帳五百餘載澤不衰，邇時邛郡伯秋漁。振頽舉廢連嘉眉，後先相繼昭孔業。未墜斯文今在茲，鶴山書院援故有。始出御翰光龍夔，因前樹幟闢新面。庭也陪濫與於斯，重成夫子矚卿國。焚香一拜先長咨，天生靈瑞必有偶。文章人物尤瑰奇，先期昆弟誇軾轍。頭角嶷嶷騰天驥，先生二難亦繼作。風骨挺拔聲不丕，齊名循吏公更矯。抗疏指奸鱗，離披大蘇長魏果相肖。明廷兩各受主知，吾道終窮不獲相生為。謫臣歿帝師，吁嗟夫子真難踰。經文况復武緯宜，十萬甲兵腹笥貯。卧龍翔鳳屯，貅貔雄鎮肯為嚴。節度雅言偏酌故山巵，先生希聖古君子。誰歟真魏同蒙嗤，是非樊然那可辨。鶉音啁啾搏鵬悲，芝蘭同馨松桂蔭。百世以俟旦暮期，噫嘻百世以俟旦暮期。今賢轉為前賢仔，君不見臨邛不來明郡守。讀書臺畔草離離，為前賢仔君不見臨邛。

和曹秋漁詠魏鶴山先生祠原韻

楊鳳廷

名賢鄉國兩相關戴父瞻師今古間
傳經授學後先班當年抗疏誠由直
此日開荒覺倍艱
為慶先生有知己巖巖象並峙崑山

七夕次涂壻中軾韻

梁映川至如

秋風飄飄吹羅裳七夕兒女競治妝
就中垂髻小女郎
身曳輕裾臨風翔結伴追從多同鄉
引線穿鍼誰短長
逐隊歛衽延頸望載拜乞巧心期償
遙借北斗挹酒漿
銀漢竟天天色蒼一心虔禱不敢狂
天孫下賜五文章
腰拖環珮聲鏗鏘美人端坐雲中央
陸離炫爛生輝光
珠絲宛轉神氣揚綵樓高結臨八荒
祝釐亭前兒大方
筵終月影上東墻忽驚天鷄唱九閩
天上人間漸杳茫
來日刺繡相寄將從容熨貼休匆忙
互看五彩雙鴛鴦

巽蟲甲庚解

梁映川

按天有十日甲乙丙丁戊己庚辛壬癸是也
周公依後天卦位作指南車只用八干而無戊己
非不用也坎戊離已運行中天泯然無迹不拘方位
不用而用用而不用用之所所以神也試以蠱卦之義
排於後天卦位之中覺彖辭句句皆有着落日日俱不放過
而甲庚之義可

新都縣志

卷十五


藝文記

五

明按四隅之卦蠱列於東泰列於西蠱從泰變乾與巽對變其第一爻而成巽坤與艮對變其第三爻而成艮也從蠱復泰端自甲始先甲一日為艮後甲一日為巽彖曰蠱元亨震一陽在下為元善之長陽德之亨以此治蠱積衰之弊有不烝烝向化者乎傳曰而天下治也玩一而字泰運方昌轉移之神勃勃不已此治蠱之始事苟日新也先甲二日為坎後甲二日為離此中爻也易非中爻不備蠱中爻互歸妹歸妹中爻互既濟不然利涉大川之辭從何而繫傳曰往有事也風利不得住泊震動元神畧無停機此治蠱之中事日日新也先甲三日為乾後甲三日為坤蠱復於泰矣保泰持盈愈深警惕兌居泰中東與震對甲日之始庚日之終日升於東而沒於西也兌一陰之終即震一陽之始傳曰終則有始天行也玩一則字足見純亦不已此治蠱之終事又日新也君子之振民育德蓋如此故曰蠱則飭也若巽之九五則不然巽非蠱而爻非卦以九居五其位正中蠱何從變故曰貞吉悔亡无不利无初有終也然巽木終虞其壞金性不壞巽與兌綜兩卦本一卦兌居西

方庚位先庚三日後庚三日雖鄰於蠱而不壞故吉也蓋未成蠱而保合於爻與已成蠱而力飭於卦氣象難易迥然不同此巽蠱甲庚之義也夫易理通達隨人觀玩皆可得解故妄臆如此不敢以為是也

後天卦位巽蠱甲庚圖



新都縣志

卷十五

藝文記

卒

謝忠愍公傳

劉景伯 新都教諭

君諱子澄字靜江號雲舫成屬新都人嘉慶庚午九月朔父夢一朱衣人抱一兒至遂生君少長性嚴正姑為物崇畏見君或乞為文祭之崇遂絕年二十一登壬辰經魁七上春官不第以甲辰大挑一等分發直隸初甯靜紳民爭所闢荒界以不決委君勘讞君丈量編籍增糧三千厯青及靜海邯鄲盧龍灤州無極每卸篆軍民泣送數千人咸豐壬子調天津漕政以不修大農告匱元年河決北豐口改漕於海君悉心釐革海舟源源來

新都縣志

卷十五

藝文補

一

畧無虧滯擢直隸州仍留視縣事癸丑粵賊由山西躡畿輔州縣多殘破君亟請於運司道府曰天津京東一大都會也海舟雲集子女玉帛咸在賊必爭而官兵被調不得反請亟募勇為戰備又出獄囚使立功自贖編入籍號津勇者凡三千人未幾賊掠滄州奸民結千百演劇神祠將乘間劫掠君市香楮臨劇場既稽拜神座大言曰賊氛日逼若輩聚多人意欲何為吾貫汝好男子盍從我殺賊立功眾感動皆願為君効死力故勇氣愈倍九月廿八日賊自滄州西君曰事急矣不出禦彼

將乘城率津勇出伏城西稍直口城臨運河濬濠引河水自固而別通南窪以待賊得習鳥銃擊水鳥者百餘人潛伏舟中屬賊至喚舟即挈舟迎舟近賊鳴金發銃又因賊智反而誘賊先是賊欲夜襲城以備嚴不敢逼縱謀入城期舉火君捕殺謀焚城隍間破屋賊望見火起整隊來濠水漲溢急不得前君遽揮勇旁擊殺賊千餘獄囚劉繼德突擒其首偽稱三王者賊潰而南趣南窪舟伏出又蹙之故大潰君擬乘勝窮追殲賊大帥勒兵尾後忽下令窮寇勿追賊始竄去後聞賊至黃家塋

新都縣志

卷十五

藝文補

二

不能軍數日招集散亡勢復振然自是不敢窺津門矣事聞擢知府賞戴花翎初賊之由豫入晉也驅難民為前鋒官軍輒殪其前以報功而避其精銳以故日報捷亦日陷城堡君出不意搗其中堅賊遂潰屯靜海之獨流鎮柵堅不可卒拔大帥調津勇譁曰我輩報父母官恩不顧隸麾下大帥調君勇乃行津人以君之未賚糧也送餅餌山積時賊方掠楊柳青聞君至遂遁十一月二十三日賊偵知大帥離營悉銳來攻君亟往援朔風吹沙石殺聲漫野君身被七創氣絕立不仆勇目于鵬

龍急負君躍入水于棟梁賈平武從之三人皆劇會有
強力者後得祔祀賊酌酒相賀次日剖冰得君尸昇至
營猶握拳瞑目作殺賊狀 上震悼加布政使銜謚忠
愍賞給騎都尉世職原籍與陣亡地方并建專祠津人
巷哭祭奠無已時至今生日奠醊忌日禁屠宰方賊之
逼天津也京師大震君殲其精銳賊遂南京師婦孺皆
曰謝知府活我

贊曰昔張巡守睢陽韓愈謂蔽遮江淮贊成中興業夫
睢陽與天津孰重江淮與京師孰重卓哉保天津以衛

新都縣志

卷十五

藝文補

三

京師厥功偉矣然非能戰又烏能守乎

謝忠愍公死事狀

李榕劍門進士

公諱子澄字雲舫四川新都縣人以舉人大挑知縣官直隸歷任青縣靜海邯鄲盧龍灤州無極咸豐壬子調天津論疏運道功遷直隸州仍留視縣事癸丑粵賊犯汴梁竄山西間道出臨洛關擾河北諸州縣公集士民長官署宣言曰天津燕趙重鎮藩衛京師且倉儲在賊必爭存城兵不足恃請得便宜募丁壯於是出獄中囚許立功自贖編入籍乃有三千人號津勇九月廿八日賊掠滄州公曰事急矣不出禦彼將乘城率勇出次於城

新都縣志

卷十五

藝文補

一

西稍直口城臨運河濬濠引河水當賊衝而別通南窪以待賊津人故習烏銃擊水鳥得百餘人使伏南窪舟俄而賊西至濠水漲溢急不得前公遽揮勇從旁擊殺賊千餘人勇目劉繼德獄囚也擒偽三王斬之賊潰而南趣南窪舟賊大潰走黃家塋野宿不能軍人馬皆仰臥徹夜相呼先是賊欲夜襲城以備嚴不敢逼縱謀入城期舉火公捕殺謀焚城隍廟破屋賊望見火起整隊來未渡濠而公與戰故大潰公既敗賊揣賊救當窮追時大帥方勒兵數萬尾賊後令諸路軍不得妄動賊詭

秘務持重勿挫我銳氣行使賊自弊公遂不果追賊初
賊掠滄州外間諸不逞無賴子弟結千百羣演劇神祠
將乘間為劫掠計公至則易冠服出錢市香楮肅拜如
儀既曰今賊氛且逼若輩聚多人陳百戲獨不畏奸人
我方釋獄囚合城中兵捕奸人若輩好男子當從我殺
賊衛身冢邀爵賞胡遊蕩為耶衆唯唯公退而召募示
不即捕意衆感動願為公效死賊竄靜海分屯獨流鎮
樹木柵堅不能拔大帥調津勇勇大譁我輩受父母官
恩冒死殺賊不願隸大帥麾下大帥並調公勇乃行賊

新都縣志

卷十五

藝文補

一

掠楊柳青聞津勇至棄糧遁大帥檄巨礮擊鎮市公曰
賊去矣彼皆良民何忍擊之親往安撫進軍良王莊靜
海人見公至咸來泣折使公在靜海我輩必不為賊虐
公來我輩更生矣公自天津出禦賊費糧不及三日既
敗賊遠近爭致得勝餅所過山集大帥上捷書公擢知
府 賞戴花翎當是時 朝廷授大帥神雀刀文武三
品下不如今聽軍法從事公嘗以一日募民夫數千應
大帥大帥又嘗令麾下兵持公所繕藤牌攻賊賊出兵
棄牌走大帥責公公率勇奪所棄牌歸以獻十一月廿

三日賊攻佟都統礮台大帥不在營公奮往轉戰數重賊大至從者勸公退公大呼曰佟都統奉命輦大礮來設與礮俱亡若君命何戰益力時日暮昏黑朔風吹沙石殺聲湯野公被七創馬逸從者十餘人于鵬龍負公走公問安之曰歸營公曰我自死所于鵬龍負公疾走公連號我創甚姑置我少休息于置公公躍入水于鵬龍于棟梁賈平武三人俱赴水死次日剖冰得公尸津勇奉公柩入城津人巷哭夾路祭至今公忌日相約禁屠宰齋戒奠醊生日則張燈樂而當時賊酌酒

新都縣志

卷十五

藝文補

三

相賀兩晝夜事 聞加布政使銜 賜謚忠愍 賞給
騎都尉世職原籍與陣亡地方建專祠于鵬龍于棟梁
賈平武三人得祔祀焉
咸豐丁巳二月禮部儀制司主事前翰林院庶吉士劍
門李榕謹狀